

ርእሰ ኢሰያስ አፈወርቂ፡ ሓለት ወጠን ወመንጠቀት ለከሰሰ መቃብለት ወደ

ርእሰ ኢሰያስ አፈወርቂ ከም ክፋል ናይላ ዲብ የም 07 ፌብራይሪ እግል ዓማታት አክባር ቀበት ዐድ ለወደየ፡ ዲብ ናይ መንጠቀት ተጠውራት ወተክሲሩ ለረከበት መቃብለት፡ የም 09 ፌብራይሪ ዲብ ናይ ቀበት ዐድ ጋራት እንዲ ረከበ ተውድሖ ሀቡ።

አሰሦት ማህየት ሸቃላ ሕኩመት እበ ከሰሰ ርእሰ ኢሰያስ፡ ሸቃላ ሕኩመት ምን ግረ ሕርየት ማህየት እብ መጽብ ቀለ ዐውል መናበረት እብ ማህየት ድህርት ልትናበር ከም ጸንሐ እት ሸርሕ፡ እብላ ሓለት እለ እግል ተኣተላሌ ሰበት ኢትቀድር ምስል ተቅዩር ዕምለት፡ ንዝም ማህየት እብ መርሐለት መርሐለት እግል ልሰኔ ክምስል ትቀረረ እት ሸርሕ፡ ክሉ ሸሩጣት ለኣትመመ ንዝም ማህየት ናይ ደንጎበ ሸክሉ አሰክ ጸብጥ ህዬ፡ እበ ለትደሀረት ማህየት እግል አንበቶት፡ ምን 1800 አሰክ 4000 ለልትመደድ 5 ሰለል ለቡ መበገስ ማህየት ከደማት መደንየት ወናይ ዲሸ ክምስል ተኣተ አፍሀመ። እለመ ምን ጉብእ፡ እተ አወላይ ለትደሀረ ሰለል ናይ ፈዓልየት ነዋቅስ ክምስል ዐለ እሉ እት ለሐብር፡ እለ እት 2020 ኣትሳናይ እግል ልግበእ እሉ ክምቱ አፍሀመ። ለኣትሳናይ ምን 2018 እንዲ አንበተ እት ፍዕል ክምስል ልውዕል ጉብእ እንዲ ትሰተተ ህዬ፡ ለትክእለለት ደፍዕየት'መ እግል ትትህየብ ክምቱ ኣትአመረ። እግል ሩትበት፡ ተጃርብ ሸቂል ውበዕድ እት ወግም ለኣተ ናይ ደንጎበ



ሸክል ንዝም ማህየት ህዬ፡ ሕፍዝ ጉብእ እሉ ክምስል ጸንሐ፡ ቴለል አፍረየት ወበቦት እቅትሳድ እት ወግም እንዲ ኣተ እት ሙስተቅበል እት ፍዕል ክምስል ልውዕል ርእሰ ኢሰያስ ሐበረ።

ለህለ መሐንዝ ኣብያት ሰከን እበ ከሰሰ ህዬ ርእሰ ኢሰያስ፡ ኣብያት ሰከን ምስል ብዕድ ኣሳሲ ሓጃት ለገይሰ ክምቱ፡ እግል ልፍያሕ ህዬ መቅደረት ኖሰነ ወናይ ካርጅ ሼርካት እቡ ክም ትጀረበ እት ሸርሕ፡ መትመዳድ ኣብያት ዲብላ

ትፈናተ መዳይን እግል ልትሸቂ ዲቡ ምን ኢቱን ለዐለ በራምጅ ክምቱ እንዲ ሐበረ፡ ለኣንበተ ምናተ ለኢተመ በራምጅ ሰበት ህለ ሰበቡ እግል ልትአመር ለጉብእ ታዩናት ክም ህለ ሸርሐ።

ርእሰ ኢሰያስ እንዲ ኣትሉ፡ አርድየት ክሰኣት ረእሰ-ማል እግል ትጥፋሕ ለህለ ናይ ብንዩት ትሕትየት ሸበካት፡ ጣቀት፡ ማይ፡ መቅደረት ብቅዕት ለከሰበት ቅወት በሸር እግል ለህለ ክም ቡ፡ እግሉ ክም ኣዳሌክ ህዬ ሰናዕት እብ ሰናዕት

ለህለ መካሰብ፡ እንዲ ትፈረገ እግል ክሉ መዋጥን ልግባእ ወወድ ካርጅ ለናይ ክሰኣት ረእሰማል በክት ክሰት ክምቱ አፍሀመ።

ኣትሐደሶት ሚናት ባጼዕ ወዕሰብ፡ ኣትበገሶት ሰናዕት ርዝቅ በሐር፡ ለግንራራብ ለሉኣብር ኣግቡይ፡ አፍይሐት ገበይ ዐሰብ - ደባይ ሲመ-ኣቶብዩ፡ ባጼዕ ነፋሲት፡ ደቀምሐራ- ሰርሓ- ላዛምበላ፡ አሰመረ- መንደፈ- ክሳድ ዒቃ፡ አሰመረ-መንሱረ- አቁርደት - እምሐጀር፡ ሱዳን፡ ወሱክ ጣቀት

ዲብ ዐሰብ ናይ 30 ሚጋዋት፡ ባጼዕ 20 ሚጋዋት፡ አሰመረ 10 ሚጋዋት ምስል ጀነራትራት ሐዲሰ ወነዘሞት ብንዩት ትሕየት ማይ ጽሩይ ውበዕድ፡ ዲብ ክፍለት ሰነት 2020 አሰክ 2021 እብ ናይ ቀበት ወመንጠቀት መዓወት እግል ልሰርገል በራምጅ ክም ህለ እንዲ ወደሐ፡ እለ እግል ልሰርገል ህዬ ናይ ቅወት በሸር፡ መዋድ፡ ማሸነፊ፡ መቅደረት አክዶት ምህም ክምቱ አፍሀመ።

ዝክረት ዐመልየት ፈንቅል ረሰሚ ተዐየደት

ዒድ ረሰሚ ዝክረት 30 ሰነት ዐመልየት ፈንቅል “ፈንቅል እግል ዐማር” እበ ትብል ሰቅራት፡ የም 8 ፌብራይሪ ሐቅ አዝር ርእሰ ኢሰያስ አፈወርቂ እንዲ ሐድረዩ እብ ነደረት ትዐየደ።

ሓክም ኣቅሊም ቅብለት በሐር ቀያሕ ብርጋደር ጀነራል ተክሌ ልብሱ፡ ዲበ አሰምዐየ ከሊመት፡ ዓያድ ወጠን እግል ዒድ እንዲ ኢጉብእ ለልትዐየድ፡ ዝክርያትን እንዲ ኣትሐደሰነ ለእሉ ሰርገልነ ወለተርፈነ ለእንቀይም እቱ ምዕራፋት ክምቱ እንዲ ሐበረ፡ እብ ሰሙድ ወመዳፍዕት ለትረከበት ሰላም እግል ትትሐፈዝ ወትደቀብ፡ ክሉ እህትማምን ዲብ ዐማር ወጠን እግል ኒዲ ለተኣትናይት ልእክት እግል ንሓልፍ በክት ዐቢ ለለሀይብ ቱ” ቤለ።

ርእሰት ልጅነት ዓያድ አሰይደ ዜይነብ ዑመር እብ ጀሀት፡ ዝክረት 30 ሰነት ዐመልየት ፈንቅል፡ ዲብ

ናይ ሰላም ወመስኩነት አዋይን እብ ጀሀት ሐቱ፡ ወራታት ዐማርን ፍራ ዲበ ለሀይብ እተ ኢነት ህዬ እብ ጀሀት ብዕደት ትትዐየድ ሰበት ህሌት አሀምየት ዐባይ ክም በ እንዲ ሐበረት፡ እለ ዝክረት ቃልየት እግል ትግመል ዶሮም ለቀደመው ጅሃት ሐመደት።

ለዒድ ለጉብእ ዐጃይብ ፈራሰት እበ ሸርሕ ወናይላ መጽእ ወክድ ለለሐብር በራምጅ ፈን ጋምል ዐለ።

እለ ክእነ እት እንቱ ሸዑበ መዲነት ባጼዕ እብ መናሰበት ዝክረት 30 ሰነት ዐመልየት ፈንቅል፡ የም ሰንበት ዐባይ 9ፌብራይሪ ዳሳት ማዕየ እንዲ ኣዳለ ጋሻህ ልትሐደር ወዐለ።

ኤሪነ ለትሰኣለቶም ሰካን፡ ዐመልየት ፈንቅል፡ ካቲመ እስትዕማር ለበሸረት ክፋል ዐጃይብ ወፈራሰት ሸዑበ ኤሪትርየ ክምተ እንዲ ሐበረው፡ ለዘተ ለኣዳውር



ለህለው ረሀየት ፍገራትላ ፍራሰ ሹሀደ አርወሐቶም ለበዘው እግሉ ሰበት ተ፡ ናይ የም ዓመት ዒድ ተርጀመት ወቀሎት ፍንቲት ክም ቡ ሸርሐው።

“እብ ዐመልየት ፈንቅል ቅርድ እስትዕማር ለነቅለ ሸዑብ፡

እብ መንገኣት በሐሩ ወጅህዱ ዐዱ ክም በኔ ሸክ ኣለበ” እንዲ ቤለው ለረኣዮም ለሀበው፡ ዲብ መዲነት ባጼዕ ለጉብእ ወጉበእ ለህለ በራምጅ ብነ እግል ልትዐውት ምናም ለልጠላብ ክም ወዱ አከደው።

ዒድ ዝክረት 30 ሰነት ዐመልየት ፈንቅል፡ “ፈንቅል እግል ዐማር” እበ ትብል ሰቅራት ምን የም 7 አሰክ 9 ፌብራይሪ እብላ ትፈናተ በራምጅ ጋምል ዐለ።

መቃበለት ርኢሰ ኢሰያስ አፈወርቂ እብ ክሱስ ሓድረት ሓለት መንጠቀትነ

ርኢሰ ኢሰያስ አፈወርቂ ለሐልፈት ሳምን ምስል ዓማት አክባር ዐድ ሓድረት ሓለት ዐድነ ወመንጠቀትነ ለትከሰስ መቃበለት ዋዲ ዐለ። ከተርጀመትለ መቃበለት አወላይ ክፈለ እሊ ተሌቲ።

ሰኣል= ሓይሰ ርኢሰ፡ ምን ክፍለት 2018 እንዴ አምቡተ፡ ተጠውራት ሰያሱት መንጠቀትነ ዲብ መርሐለት ሓዳሰ ኣቲ ሀለ። ሐቲ ምኑ ህዬ፡ 20 ሰነት ለኣተላሌት ጽብኢት እንዴ አክተመት፡ ዲብ 9 ጁላይ 2018 እት ፍንጌ ኤረትርየ ወኢትዮጵየ ዲብ ኣሰመረ ለትፈረመት ሐምሰ ለታኪያተ እትፋቅየት ሰላም ወመዓወነት ተ። ከሄራር ናይለ እትፋቅየት ሰላም ከአፎ ሀለ፤

በሊሰ= “ለሰኣል እብ ገበይ ቀላል እግል ንፍሀሙ፡ እንዴ አቆሬነ ዶል እንርእዩ ሌጣቲ፡ ኣሰክ ኣየ ለሄርር ክም ሀለ እግል ነኣምር ለሰዓ። ምን ሐረሰ እሊ እቅባለት ገጽ ሐር ተኣትሐዜ። እግልሚ፡ እለ እትፋቅየት እለ በነ ክም ሐደሰ እግል ንርእየ እንቀድር። ዲብ ሰር ሰነት 2018 ለእትፋቅየት ትፈረመት፡ ሰላም መጽኣት ወመዓወነት ሕድ አምቡተት እንዴ እምቤ እግል ንትሃጌ እንቀድር። ላኪን፡ እግል መትፋቀዲ፡ ዲብ ታሪክ 80 ሰነት እግል ልትክምክም ቀድር። እብ ናይነ ተፍኪር እግል ንፍሀሙ ወተርጀመቱ አክል ሕድ እግል ነኣምር ገብእነ ምን ገብእ፡ እሊ ኩሉ ዐዳዋት እግልሚ መጽኣ፤ ኣሰባቡ ሚቱ ወእብ ከአፎ እግል ልትሸረሕ ቀድር፤ ኣሰክ ዕምር ሰለሰ አጅያል ለኣተላለ ኣሰባብ ለኣለቡ ዐዳዋት፡ ክተማቱቱ ወለ አምቡተቱ እምቤ ምን ገብእ፡ ዲብ ክፍለት 2018 ለዐለ ተጠውራት፡ እስትሸሃድ ክቡድ ለትደፈዐ ዲቡ፡ ተጅርቡት ረያም ለትክእለለት እቱ ለኢለኣትሐዜ ዐዳዋትቲ፡ ላኪን ንቅጠት ተቅዩርቱ እግል ኒበሉ እንቀድር። ለናይ 20 ሰነት ጽብኢት በነ ምን እንርእዩ፡ ሰበበ

ሚቱ ምን እንብል፡ ኣተላላይ ናይለ ቀደሚሁ ለዐለ፡ እግል መሰለሐት እስትራተጅየት ቅዋት ካርጅ መንጠቀት ወዐላም እግል ልክደም እንዴ ትባህለ እብ ቀሰብ ለትጸእረ ሃዳፍ ስያሱትቲ። ዲብ መንጠቀትነ ወእብ ፍንቲይ ዲብ ኢትዮጵየ እት ፍዕል ለለኣውዕሎ አንዝመት ሀዬ፡ እምበል ኣትካራም ዓዳዋት ለኣትሳውሮ፡ ኣሰባብ እንዴ ከልቅ ደም ልትከዔ፡ ኣበ ትትከለቅ፡ ለኢለኣትካርም ክላፋት ለኣተላሌ፡ ወእሊ ክም ኣሰባብ እግል እለ መንጠቀት ለዐዝበ ጸንሐ።

እት ሄራር ጽብኢት 20 ሰነት፡ ኣከይ መቅሬሕ ሕዱድ በህለት ሐርብ ባድሚ እንዴ እምቤ እግል ንትሃጌ እንቀድር። እሊ ክላፍ እሊ እግልሚ መጽኣ፡ ምን በዲሩ ክምሰሌሁ እግል ለሀርሰ ለቀድር ታሪክ በኣሰ ክእሉል ዐለ ገብእ፤ ኢፋሉ። ኣዜ እንርእዩ እንዴ ህሌነ ተርጀመት ለኣለቡ ዐዳዋትቲ ለዐለ። እበ ናይ በዲር ምክያል፡ እግል ናይ ካርጅ መሳሌሕ እስትራተጅየት እግል ልክደም ወልገብር እንዴ ትበህለ ትከለቀ። ሓቅ ሐርብ ዐለም ካልኣይ ሸዑብ ኤረትርየ ክም ክሎም ሐንቴ እስትዕማር ለዐለው ገባይል፡ ሐቅ ሕርየቱ ወእስትቅላሉ እግል ልርኩብ ሰበት ኢቀድራ፤ እሊ ኩሉ ሄራር እግል ለሄርር ትቀሰቡ። እሊ ምን ፈርደዩ ዲቡ ምን ልትበህል ህዬ፡ ቅዋት ካርጅ ለፈርደው ፍርድ ዛልምቲ። ሕርየትነ ወእስትቅላልነ እግል ንርኩብ ህዬ፡ ሄራር ረዩም ሄረርነ ወእስትሸሃድ ቃሊ ደፋዕነ። ሐርብ ግድለ ታሕሪር እንዴ ትከለሰ፡ ሐርብ ብሩድ ሐቅ ኣክተመ ዲብ መርሐለት ሐዳሰ ክም ኣቲነ፡ እሊ መሻክል እሊ ለኣትሐዜነ ዐለ ገብእ፤ ለዲበ መደት ለሀ ለዐለ ኣሕዳሰ ሐር እንዴ ኣቅበልነ ምን እንርእዩ፡ ሕነ ተርጀመቱ ወሀደፋ ባዲ መኒነ ኢዐለ። እብ ሰብ ኣፍካር ጨቢብ ለትደረክ ዐለ። እበ ለትደፈዐት ከሳር ወለበደ

ኣብካት ሌጠ ለልትመዘን ኢኮን። እብ ፈድል ኤማን ወሰባተት ሸዑብ ኤረትርየ ህዬ፡ ወክዱ እንዴ በልዐ ኣክተመ።

እሊ ክላፋት እሊ እግልነ ሌጠ እንዴ ኢገብእ፡ እግል ሸዑብ ኢትዮጵየ ህዬ ሚ ፋእደት ዐለት እግሉ ገብእ፤ ወለ ሐቲመ። እግል መሰለሐት ሐዳም ሰብ ኣፍካር ጨቢብ ምን ኢገብእ፡ ሸዑብ ኢትዮጵየ ምን እሊ ክላፋት እምበል ከሳር ለከሰበየ ሐበት ኣለቡ። እሊ ክላፋት እሊ እምበላመ ሰብ መሳሌሕ ብሕተ ዲብ ቀበት ኢትዮጵየ ናይ ካርጅ ቅዋት ሰበት ተሓበረው ዲቡ፡ ወቅቱ ፊመ፡ እስትሸሃድ ክቡድ ኣድፈዐ ወኣብካት ፋዬሕ ኣብደ። እሊ ቀደም ሰነት 2018 ለዐለ ተዋልልቲ። እብ ክምኩሙ እሊ ለትባህለ ኣከይ-መቅሬሕ፡ እብ ለገብእ ልግብእ ኣሰባብ ቅቡልየት ይዐለት እግሉ። ሐቅ ሐርብ ብሩድ ዲብ ኢትዮጵየ ለተፍኪር ዐቅል ሰብ ብጭቡጭ ወመሳሌሕ ኮተት ሐዳም ለሰበበየ መደረት ለትደቀበት ተ። እብ ቀውምያት ወኣቃሊም ለካፍል፡ ዲብ ረወክ ብቅት ለሸምም “ሐቅ ተቅሪር መሲር” እንዴ ትበህለ ለትከለቀ መትፈንጣር፡ እት ቀበት ኢትዮጵየ ለትኬለመ ፈንጨጋር ቀውምያት፡ ቀባይል፡ ኣቃሊም ወገባይል ሰበቡ። ለእግል ብፍእ ዱለት ድቅብት ለከድም ዓዳት ወነባሪ ብዝሐ ቀውምያት ወቀባይል ሐር እንዴ በለሰክ ኣሰረቶቲ፡ ዲብ ቀበት መጅተማዕ ኣትሳዋር ነዐር ወኣትቃርሐት ብዱ በዳኮ ሌጣቲ። እሊ ፍጥር መትፈንጣር እሊ ለኣነብት እንዴ ሀለ ለመጅተማዕ ባል ኢከረ እግሉ ገብእ ላኪን፡ እግል መጅተማዕ ኢትዮጵየ ዲብ ገበይ ብቅት ዋለ። እሊ ኣዜ እንርእዩ ለህሌነ ክላፋት ህዬ፡ ናዩ ፍንጌት ቲ። ሐርብ ሌጠ ኢኮን። ለፍጥር ሰብ ተፍኪር ጨቢብ ሸክል ሙኣሰሳት እንዴ ኣጽበጥካህ፡ ሸዑብ ሐቲ ዱለት ኖሱ-ኖሱ ሕድ ክም ለኣቤ፡ መትሐዋራር ወኢደማነት ሕድ ከሊቅ፡ ደም ሕድ ክም ልክዔ መትጻጋም፡ ምኑ ለለኣኪ ደማር ወመትፈንጣር ድወል ኣለቡ። እሊ ዕድር እሊ ህዬ፡ ሐቲ ዶል እንዴ ኣተ ሐቅ ሰብቀ፡ እግል ትሳርዩ ለሀለ ጸገም ለትደቀባቲ። ከእሊ ዲብ ኢትዮጵየ ለሀለ ሓድር ተዋልል እብ ለትፈናተ ኣግቡይ እግል ንሸርሐ እንቀድር ላኪን፡ ዲብ ደንጎቡ ለኣክል! እግል ልትበህል ለወጅቡ መካፍላይ ወመፈንጥራይ ኣፍካርቲ።

እት ቀበት እሊ ለመሰል ፈንጨጋር ኣቢ ለነሰኣየ ምስዳር፡ እብ ከአፎ ዲብ ፍዕል ትተርጀም ኣርእሰ ብዕድቱ ላኪን፡ ወቅት ለጠልቤ ባትካት ወእግለ ለዐለት

ትምኔት ሸዑብ ለትወክል ምስዳርቲ። እለ ምስዳር። እለ ህዬ፡ ምን በሕ ለትበገሰት እንዴ ኢትገብእ፡ ሸዑብ እተ ለዐለ ለፈናቱ ወለካፍል ኣፍካር ጨቢብ፡ ለዐለት እግሉ መቃወመት ለከልቀታተ። እት ክምሰል እሊ ለመሰል ናይ መትብጭባጭ ተዋልል፡ ቀራር ወንሰኣት ምስዳር ባትክት ሰበት ለኣትሐዜ፡ ኣቢ ለነሰኣየ ሸብር ሰይሐት ኣክላዋ ወኣርተዖት ሄራር ጭውጩይ ለትትሐምድተ። እግልነ ሕዲሰ ምንመ ኢኮን፡ ለሸሬሕ ክም ትቀደመ ለከልቀየ ሰኣየት፡ ወለትረኣ ተዋልል ፈርሐት ኩሉ ለልትዘክሩ ቲ። ከእተ ለሐልፈየ 20 ሰነት ለትረኣ ወለሐለፍናሁ ሄራር፡ እት ፍንጌ ሸዑብ ኤረትርየ ወኢትዮጵየ ዐዳወት ወከራህየት ከሊቅ፡ ወምሰዐል ኩሉ እብ ናይ ከኣተት ብሕተ ምን ኢገብእ እብ ኢትዮጵየ ለኢፈክር ወለኢለሐሰብ ክራም ለሰበበየ ኣከይ-መቅሬሕ ጀሪመት ቲ። ለዐለ ጀራይም እግል ለኣክትም ህዬ፡ ለትትሐመድ ምስዳር ትነሰኣት። ኣቢ ለነሰኣየ በዳሪት፡ “ምስል ኤረትርየ ሰላም፡ ፍቲ፡ መዓወነት ሌጠ ተኣትሐዜነ” ብሂል ኤማን ወመብዳእ ሕጡጥ ለለኣትሐዝየ ዐለት። ምናተ ኩሉ ለክላፋት ትከለሰ ወዲብ ካቲማሁ በጽሐ ምንመ ኢኮን፡ እትለ ደረጀት እለ ብጽሐት እግል ኖሱ፡ ፈሸል ወድብር ተፍኪር ናይለ እት ቀበት እለን ለሐልፈየ 20 ሰነት ለዐለ ኣከይ-ተዋልል ትዋሌ ለዐለት ኮተት ወመናቢተ ለለኣክድ ቲ።

ከእለ ለትበጸሐት እትፋቅየት ሰላም ወመዓወነት እበዩ መርበይ ተሄርር ህሌት፤ እምቤ ምን ገብእ፡ ሐቲ ምን ተከዩለ እትፋቅየት፡ ባልሐት ቅድየት ሕዱድ ቲ። ቅድየት ሕዱድ ምነ እትፋቅየት ሰላም ለትበጸሐት ዲቡ ወቅት ወሐር ምን እንርእዩ እት ባድሚ ወባኮተ ለሀለ ተዋልል፡ እብ ለኣኪት ደረጀቱ ለኣተላሌ ሀለ። ለቅድየት ፍርድ ቃኑን ለተህየበ ዲቡ ወለትወረረ ምድር ሰያደት ኤረትርየ ዲብ ሰብኡ እግል ለኣቅብል፡ ክልኢተን ለድወል እብ ኣሳሰ ሕሸመት እትፋቅየት ሕዱድ እስትዕማር፡ ለፍርድ ዲብ ፍዕል እግል ልውዐል ለኣሰትህሉ ዐለ ላኪን፡ ኢትቀደረ። እግልሚ፤ እምቤ ምን ገብእ፡ ለምን በዲሩ እሊ ለኢለኣትሐዜ ክላፋት ለከልቀ ክራም ወያኔ፡ ለቅድየት ክም መሀደዲ ወመትፋርሂ ወክም ከርት ቤዕ ወዕሸረ እግል ልትነፋዕ እበ ምን ቤላቲ። እት ቀበት እለን ሰነት ወሰር ዲብ ባድሚ ወባኮተ ሚተጠውራት ትረኣ እምቤ ምን ገብእ፡ ዲብ ተፋሲል እንዴ ኢነኣቲ ዲብ ለኣኪት ርሸመት ባጽሕ ሀለ። ሕነ ላኪን፡ ምድርነ እንዴ ኢኣቅበሌነ እለ ይእንወዴ ወእለ ይእንገብር ይእምብል። እግልሚ፡



ምን ገበይነ እንዴ ኢእንሸክፍ፡ ገጽነ ቀደም እንዴ ኣንጸርነ፡ ኣውለውያት እንዴ ረተብነ እግል ክልኢቲ ለገባይል እበ ለለኣከሰብ ወለለኣረቤሕ መርበይ እግል ነሄርር ብነ። ለብዕድ ሸብር እብ ሸብር እግል ነዐሬ እቡ እንቀድር።

ዲብ ባድሚ እግል ክም ሸዑብ ምድር ልትህየብ ሀለ፡ እግል ምን ልትካፈል ሀለ፤ እበዩ ቃኑን ወመምሬሕ እምቤ ምን ገብእመ፡ ለዲብ ቀበት ኢትዮጵየ ለሀለ መሻክል ለከልቀዩ ቲ። ለተሐለፈ ኣከይ-ተዋልል ዲብ ኣቃሊም ኢትዮጵየ መትፈንጣር ከልቀ። እብ ኣማን ዲብ ኢትዮጵየ እት ኩሉ ለትትሐከም ሕኩመት መርከዝየት ዩዐለት። ለጸንሐ ኣፍካር ጨቢብ ኣሰክ እለ ሰበት ኢትመሐ፡ እግል ትነሰኣት ምስዳር ሰላም ወመዓወነት ኣሰክ ደንጎበ ፈሸልክ ትትቃወመ በህለት ቲ። እሊ ኣዜ “እብ ግብለት ወቅብለት፡ እብ ምፍጋር ወምውዳቅ ተዐጺነ፡ ዲብ ከሌብ ከርዶን ኣቲነ ተሓሰርን” እንዴ ልትበህል ልትረኡ ለሀለ ዐሉባዋ ወመትረማጭ፡ ጽባቡትለ ዘርእ ፈሸል ቲ። መጥ-መጦሩ ህዬ፡ ለትፈናተ ዐዳዋት ተሐብክ ወትፈብርክ። እሊ ኩሉ ለቀራር ፍርድ ዲብ ዐመል እግል ኢልውዐልቲ። እትለን ሰነት ወሰር ክምሰለ ለረኡናሁ፡ “መዐላክር ላጅኢን እንዴ ከሰትነ ቅወት ኣዳም ኤረትርየ ምን ንትሐደር ዲቡ መቅደረተ ተሐውን ትቀድር” እንዴ ትበህለ ለተሐበክ ከይናት ቅያሰ ኣለቡ። እሊ ህዬ እዴ ቅዋት ካርጅመ ህሌት ዲቡ። ከለ ተፍኪር፡ ዲብ ፍንጌ ኤረትርየ ወኢትዮጵየ ሰላም ክም ኢትትመድድ፡ መዓወነት ክም ኢተህሌ፡ ለጸንሐ ክላፋት ክም ለኣተላሌ ወለቅድየት ሐል ክም ኢትረክብ፡ እብ ክራም ሰብ መሰለሐት ብሕተ ልትከደም ጸንሐ ወሀለ። ምናተ ለመጽእ ሄራርነ እግል ለዐንቅፍ ለቀድር መሐሲት እንዴ እንግሌሕ ወእንሸንክ ለብጽሕት ለህሌት እትፋቅየት ሰላም ወመዓወነት እንዴ ነኣደቅበ እግል ነሄርርቲ። ገሌ-ገሌ ለለኣሰፍ ጋራት እግል ንርኡ እንቀድር ላኪን ምን ገበይነ እግል ለኣሸክፈነ ኣለቡ።”

ዲብ ገጽ 5 ልተላሌ

እፈትርየዐሽዳክ

ክል ኣርቡዕ ለትጠ'በዕ ጀሪደት

መዳልየት፦

- መሐመድ እድሪስ
- ከልሹም መሐመድ
- ኣድም ሳልሕ
- ሳልሕ እድሪስ

ለይኣውት ወኣርተዖት

* ዘሀረ ዐሊ

* ፋዋነ ኣድም

ተለፎን። 121797/07121322

ፋክሰ። 127749። ዕ.ሰ.ቡ። 247

ተውገዕ ጀሪደት።

ተለፎን። 200454

ኣትኣመሮት።

ተለፎን። 125013። ዕ.ሰ.ቡ። 1284

እዝን አክል አመት



ፋይድ ወስተል ለልትበህሎ እሴት ወእናስ ውላድ እንዴ አበ እግሎም ክልኦት ግንዳይ ዲብ እንቶም ነብሮ ዐለው። ጀላብ ውላድ ዲብ መሳርየት ለአንጎት ነብረው። ለመሳርየት ክል-ምኖም አነ እግል እሳፊኩም አክል

እሊ ማል ወንዋይ አምጽኦ እት ልብሎ አትዐበዎም። ሰሮም ገመል፡ ገሌሆም ነኦት፡ ሰሮም ገሌ ‘ሐ’ ወገሎሆም-መ አግሩሽ ልተምነው ዲቦም

ዐለው። ውላድ እግል ልርከቦ እንዴ ቤለው ደለ እግል ጠልበው ምኖም እንዴ ለአትሞ ንዋዮም ወአግሩሾም ትከለሰ። ምን መሳርየት ክምሰል ተሐለለው ዲብ ሐካይም እግል ሊጊሶ አንበተው። ሐካይም-መ እበ ትትቀደሮም ባሰሮ እግሎም ዐለው። ምና-ታ ውላድ እግል ልምጽኦ ኢቀድረ ክምሰል ተሐለለው ህዩ እግል ረቢሆም ትገሰው።

መደት ሐቲ ፋይድ ምሰል መሳኒቱ እንዴ ልትሃጀክ እሴቱ እበ ጀፈሮም ሐልፈት። ለሱብ ሽንኩሳ እሴት እንዴ ገንሐ “እለ እሴትከ ዐምሳት ትመሰል ህሌት ዮም ዓመት እንሻለ ረቢ ውላድ ለሀይበከ” ቤለው። ፋይድ ሰኒ ወአማን ትፈከረ “ሰምዑኒ እግል እትሰአለኩም፡ በቀል ትወልድ?” ቤለዮም። ዎሮት ምነ ሱብ “አፎ ኢትወልድ! ለሐሰ ወለ ትነወረ ውላድ ትወልድ” እት ልብል በልሰ።

ፋይድ ምነ ህግያህ መልሀዩ ማሸግ ዲብ እንቱ “ግምሽ ኢተአትባዴኒ፡ አነ እሴቼ በልቀት ጉብኦት ወበልቀት ኢትወልድ” ቤለዮም። ለበዲር በልሰ ዲቡ እናስ እንዴ ኢልትሐለል

“በልቀት ረቢ ሐቆ ሀበዩ ማይ ትነቅዕ ወማይ ለሐሰ ውላድቱ” ዲብ ልብል ለኢትጸበረዩ በሊሰ ሀብዩ። ፋይድ ቀሉ እንዴ ኢበድል “ረቢ እመኖ እለ እሴቼ ወልደት ምንጉበእ ዲብ ሰመዶት ጠሊት እዝነ አክል አመት-እናስ ትጉብእ እግል ሕረድ። ያረይ ምስተንክር ይኦርኤኮኩም ምንጉበእ በዲር ፋይድ ይኦነ” እት ልብል ትመክሐ።

ለሱብ ሰኒ ትሰሐቀው እቱ። “ሕነ እብ ጉብእ እንብለ ጸንሐኒ። ምና-ተ እለ እሴትከ ለከባደተ ገርብ ዐምሳት ትመሰል። ሐሬ ወልደት ምንጉበእ ላኪን ኢትክጀል እት ልብሎ መክረው።” ፋይድ ህግያሆም ዐውል ኢሀበዩ። “ብህልኩምተ ህሌኩ፡ እለ ሱተል ወልደት ምን ጉብእ ጠሊት በርዐዳይት ለእዝነ አመት እናስ ትጉብእ እግል ሕረድ ክምሰልቱ ሽክ ኢትውደው” ደግመዮም። ለሱብ ዲብ ህግያሁ እንዴ ልትፈከር “እንሸለ ረቢ ውላድ ለሀበከ ሐሬ ወጠሊት ሕረድ ወወኦት” እንዴ ቤለው ጌሰው ምኑ። ፋይድ እብ እንክሩ እንዴ ገንድል ዐዱ ዔረ።

ሱተል አክለ ምድር ጸብሐ ድርጸ እት ለዐቤ ጌሰ። አንሰ ፅምሰነ ቀዳሙ ሰበት ሰትራሁ ምን-መ ትሰአለዩ በሊሰ ከልኦቱ። ዶል እሙ፡ ዲብ ልሰአል ወዶል ሐማቱ አተንተነ ወእግል ለአምር ጀረብ። ለአንሰ ለፅምሰነ ክምሰል ብድሆ ሰበት ሐሰበያሁ ክለ ረኦሱ እግል ለአሰእላሁ ይሐዘዩ። “እንተ ሚ ሻፍገትከ ህሌት አፎ ክእነ አተንተንክ? ለተዐመሰ ኖሱ እብ ዶሉ ልትወልድ ወለኢትዐመሳ-መ አካኑ ኢልሐልፍ” ዲብ ልብል በሊሰ ከልኦሆ። ፋይድ ላኪን እሴት

ለድርጸ ኮክለት ዲብ እንቱ እንዴ ልርእዩ ኢትወልድ እንዴ ቤለ ሰበት ሐሰበ ክሉ ረኦሱ እግል ልእመን ኢቀድረ።

ሱተል ወረሕ ክምሰል ተመ ሕጻን ትበከረት። ፋይድ ላኪን እበ እንክር ለዎሮት ፈረሐ ወእበ እለ ብህል ዐለ ደንገጸ። ሱብል ድጌ ፋይድ ጠሊት እዝነ አመት-እናስ ለትጉብእ ምን አዩ እግል ልርከባቱ? እንዴ ቤለው እብ መትዐጃብ ጸበረው። ለምድሮም ህዩ አግሎ ገውሊት ሰበት ዐለ፡ ጠሊት እዝነ አመት-እናስ ትጉብእ ኢኮን፡ ጠሊት አዛኒት እግል ትትረኩብ ዲቡ ኢትቀድር።

አምዒላት እት ልትወሐዩ ጌሰዩ። ፋይድ ለጠሊት ምነ ለአመጽኦ ትቀዌት ዲቡ።

ዲብ እንቱ፡ “አነ ክምሰለ ቀልዬ ጠሊት እዝነ አመት-እናስ ለትጉብእ እምጽኦ ህሌኮ ወኦዜ ለእናስ ዲብ እሊ ቀደምኩም እግል ንቀይሶቱ” ቤለዮም።

ለአዳም እናስ ምኔ (ናቅሰ) ጉብእ ረክበ እት ልብል ፋይድ ለወልዱ እንዴ ሐቅፈ መጽኦ። ዲብ ቀደምለ መሐበር እብ እዴ ናይለ ዐለቅ ቀየሰዩ። አመት ናይለ ጅነ ወለ እዝነ ጠሊት አክል ሕድ ጉብኦዩ።

ፋይድ ፋርሕ ዲብ እንቱ “እሊ ወልዬ እናሱቱ ማሚ? እብ እዴ እናስ ቀየሰኩህ ወአመት ጉብኦት። እናስ ኢኮን ለልብለኒ ለወልዬ ነቃሰቱ ለአርኤኒ” ቤለዮም። አዳም ክሉ ሰፍገት ወደ። ፋይድ እብ በሰር ናይለ ጅኔታይ ምን ክጅል ወአከጀህ ትነጅ። ለጉብኦት ምስእለት እብ በሰር

እግል ትትባለሕ ትቀድር።

መሐመድሰዲድ ዐሰማን እት ክታብ እፈ ለከትብዩ ቅሰት



ሳወ፡ ጅግረ ድራሰት ወፈን ጉብኦት

እት መድረሰት ዋርሳይ-ይክኦሎ ሳወ፡ ክም መርከዝ በቃዐት አካዳሚ እግል ልድረሶ ለጉብእ ጅህድ፡ መቅደረት ደረሰ ለፊትሽ ድራሰት ወፈን ለከምከመ ጅግረ እት ዮም 08 ወ09 ፌብራይር ጉብኦ።

ሙዲር 2ይት ደረጃት መድረሰት ዋርሳይ-ይክኦሎ ሳወ፡ መምህር ርእሶም ጉብረሂወት፡ ለጉብእ ናይ ዓዳት ወፈን ጅግረ፡ ኦሮት ክፋል ናይ ከደማት ደሪሰ ወኦድረሶት እት ጉብኦ፡ ምን ሰልፍ ናይ አወላይ ሰሚስተር እት ድራሰት ለረከዘ ለትፈናተ ጅግረ እንዴ ትነዘመ፡ እት ፍንጌ (ብሎክ) ጉብኦ ክም ጸንሐ አብርሀ።

“ሀመሎት ዐዋዲኩ፡ አብደዮት ህውየትከ በህለት ቱ” ለቤለ መምህር ርእሶም፡ ሽባብ፡ መቅደረት ወምህነት እንዴ ተዐንደቀው ፈሀም እንዴ ረክበው፡ ምዩሎም እንዴ ትፈረገ መትጃግረት እግል ልግባኦ

ለአመመ ክምቱ ሸርሐ። ሳወ፡ ምሕል ውርስ ዓዳት ሰበት ቱ፡ ሸባብ ደረሰ ንዩቶም እብ ዋጅብ እንዴ አመረው እት ምስተቅበል እብ መትሰባል እግል ልክደሞ ክሱት እግሎም ለህለ አብካት እግል ልትነፍዮ እቡ ትፋኑ።

እት መድረሰት መስኦል ዓዳት ርያደት ወዓፍየት መምህር ተሾሚ

መሐሪ እብ ተረቱ፡ ለወራታት እት ሕላይ፡ ተማሲል፡ ቅሰሰ፡ አሸዓር ውብዕድ እቱ ለረከዘ ክም ዐለ እት ለሐብር፡ እት ፍንጌ ደረሰ ወሕደት እግል ትትከለቅ ወውርስ ታኦሪክ እግል ልሰበት ሴድያይ ክምቱ አፍሀመ።

እት ደንገብ፡ እት ወራታት ፈን ለተዕወተው መትናየቲ ጀዋእዝ ተሀየበው።





እት መሐል ሹሀዳን ሳብታም ክም በዲርነ እበ ትብል ሰቅራት ምን 16-19 ጅኑዋሪ 2020 መሕበር



ሙናድሊት መድህን

መትሰዳዳይ ሙናድሊን ክፈል ዲሽ 16 ወ70 እብ መናሰበት 30 ሰነት ዝክረት ዐመልየት ፈንቅል አካናት ዐማር ወዳይም መሳክብ ምሒርበት በጽሐው ወለደምህ ሳይተት በሐር ቀየሕ በሐርም ዐፈው። ለምሒርበት ዲብ ጥዋሎት ለሀላ ትምሳል ደባባት ሹሀደ ዝክረት ሹሀደ እንዲ ወደው ፅምቦብ ከረው ወጥዋዩ ኡብረሀው። እት ሐንቲሆም እት ጋድመት እንዲ ዐሽለገው ሆይ ምን ብዙሕ እግል ልትደገም ለወጅቡ ገሌ ተማተመው።

ኮሎኔል ዳንኤል ለልትበህል ሙናድል ፋትሐይት ባብ ናይላ ቤለየ ሙናድሊት ታሪክ ህድግ አበላ። መድህን ዘርኤ ትትበህል። እሊ መለሆየ እት ዐመልየት መረሕ ሰርየት ለዐለ ፈራሰት አንሳት ትወክል እዩ እንዲ ቤለ ሐረየ።

ምድር ወአዳም ትዕብ ሰበት ዐለ አሰፍ ዲብ ልትሰምዖ “እት ናይ ሰለሰ ምዕል ሐርብ እንዲ አቴኮ ለእብል አሰብዬ። ሳኪን ክለን ለሀለየ ወለአስተሸሀደየ ሙናድላት መልሆያትን ለትወክል እዩ እለ እግል እፍቀድ እኩም። እት ናይ ሰልፍ ሐርብ ዕለት 8-2-1990 ሰርየትን ለሀይብተ ዐለት አካን እብ አልቃም ሕጽርት ዐለት። ወለገበይ እግል ትክፈተ ዐለት እለ። ህታመ እግለ ሐቲ ፈሲለተ አልቃም እግል ትክፈት ቤዘ እግል ትግበእ የመመተ። ማርሓይትለ ፈሲለት ለዐለት ሆይ መድህን ዘርኤተ። ህተ እግል ካልኣይት መጅሙዐት ሕለፊ እንዲ ትቤ እግል ተአዝዝ ዐለት እለ። ምናተ ክምሰልሁ ኢወዴት። ፈሲለተ እንዲ መርሐት እግለ አልቃም ዲብ ትርእዮ አሰርዬ ግብእ ተሉቶም ከአቴት እቲ። መድህን ሳልሰ ረአሰ ዲብለ አካን አልቃም ትፈጀረ እቶም። ህታመ ዲቡ ጅረሕ ክቡድ እንዲ ትጀረሐት ወድቀት።

ለዶል ለሀ ለትጀረሐ ልግበእ ወለአስተሸሀደ ለልትረፈዕ እት ሓለት የዐለት። እት ትርእዩ እግል ትሕለፎ ትጀብር ዐለት። ኢትርፍዕወ እንቤሎም። መድህን እንዲ ኢትረፈዕ ክለ ለሰርየት እለ እንዲ ኬደት ሐልፈት ከእምበል ነቃሰ እት ይመም እለ ለዐለ ሐርብ ክቡድ አቴት። እት ደንገበ ለሰርየት ክም ሐልፈት ሰለሰ ነፈር እንዲ አትረፍነ ምን ምውዳቀ ሁሩስ እንቤሎም።

መድህን ‘ፋትሐይት ባብ’ ናይላ ዐመልየት ሌጠ እንዲ ኢትገብእ።

ፋትሐይት መንገእት

ለአልቃም እት ትርእዩ ሐር እንዲ ኢተሐረግርግ ለአቴት እቲ ጀለ ሸበበ ወእስትቅላል ወጠነ ፍዘ ለገአት። ምናተ ምን አልቃም ለሀይ እንዲ ተርፈት (ምስል ክቡድ ምስክናሃመ ምን ገብእ) አሰክ እለ እብ አርወሐተ ለሀሌት ክም ምን ገብአትቱ ወኪለት ናይላ መልሆያትን ሙናድላት እግል ትግበእ ሓሪህ ለሀሌት” ቤለ ሌ/ኮ ዳንኤል።

ምን እሊ አልቃም ከንቴባይ እብ ሕድት ከሳረት እንዲ ፈግረ ዲሽ ሸዕቢ እት ሐርብ ክቡድ ተሓበረ። ሰጋለት ቀጣን እንዲ በትከ ጅወት ባጼዕ እግል ልእቱ ቱ ለአለምባዩ። ዲበ ለዐለት ገርብ ለቀርር ምን ሓለት ወረአሰ ለተረፈዕ ፈራሰት ሙናድሊን አንሶም ወተብወቶም እትሕጭር እንዲ አበለ ሸርሐ።

ዕለት 11 ፈብሩወሪ ብርጌዶም ብርጌድ 10 ናይ ክፈል ዲሽ 70 - አወላይት ካልኣይት ወሳልሳይት በጠሎኒ። እብ ቀጣን ገበይ ሰጋለት ዲብ ለአትየ ማን ወገለብ አወላዋ። ጅሩሕ ወሸሂድ ርፍዐት ምኑዕ ክምቱ መምሬሕ ተሆየበየ። እለ የም እብ ክልኣት እትጀህ መካይን ተሓልፍ ለሀሌት። ገበይ ባቡር። አጋር ወዐጀላት ክምሰልሁመ ምን ግድም በሐር ሸሬዕ ጋብእ እት ለሀላ ቀጣን ገበይ ሰጋለት። ለዶል ለሀይ ሐቲ መንኪነት ሌጠ ለተሓልፍ። ሐበት መጸግዒ ለአለበ እብ አማን ቀጣን ዐለት።

ምክኤል እምባፍራሽ (ወዲ እምበ) እት ሴዕ ፈብሩወሪ እግሩ እንዲ ተሀንኣት ግያሰ ምን ኢቀድረ ሐር እንዲ ሐደግናሁ ሓልፋም ዐልነ። ሳሊ ወአምዕል ገይሰ እንዲ ትመየ እት ዜሮ ሰዐት (ዶል ብጋሰት እግል ህጃም) ሰዐት ሰቡዕ ሐድሬ። አቅብል ዲብ ልትበህል እንዲ ተ’ለዐ ሰርየቱ እንዲ መርሐ እት ሐርብ አተ። አወላይ ሸሂድ ናይ ሰጋለት ገብእ። ቅዋትን አሰክለ ቡንቶ በጽሐ። ምኑ ወኪን እግል ልትቀደም ሳኪን ኢቀድረ። እግልሚ። አባይ ሕፈር። አክያሰ እክል ራድኢት። ሐዲድ ባቡር ሰቡብር መካይን እንዲ ረጅመየ ሳትር እትሕጡዋ ዐለ። አክለ ቀረብክ ለሀላ አሰለሕ ንኡሽ ወዐቢ እሱር እት ምን ዐለ ሐርብ ዝያድ መረ። ላመ በሐር ሸባህ ምንክብ ሃይበትን ለዐለት። አክለ አርድ መሰ እት ተዐይር ምን ዔረትተ ሰላሕ ማይ በሐር እንዲ ለግመየ እግል ትልከፍ ወትዝበዋ ኢትቀደረ። ምን ሐርብ ለግድለ ምስል በሐር አከ። ደለ ትጀረሐ ዲብለ በሐር። ደለ አሰተሸሀደ ዲቤ ለሕያይመ ምስሎም። ምን ጅረሕ ወእስትሸሃድ ለተርፈ እለ ወዴ ትቀዌት እቲ። ጅሩሕ ልስፈፍ። ዝናሩ ልርፈዕ መሸሂድ ለሀርሰ መአርወሐቱ ለአፍግር የኣመረ። ምስል ክሉ እሊ መሰደድ። አብሸር! እት ልብሎ አድሕድ ለአትዳፍኡ። እብላሆም ሳዐት 7:00 አሰቡሕ እት በሐር ለአተው። ምሴ ዕን ክም ወድቀት 7:30 ፈግረው ምን። ሸሂዶም። ጅሩሕም። ሕያየም ጽዋርም ክሉ ምስል 12 ሰዐት እት በሐር ምስል

አምዋጅ ወማይ ጩወ ሀምእ ወዐለ። ምር ናይላ ሓለት ርኡይቱ።

ምስል ክሉ እሊ ሆይ እትሳላት አለበ። ረዋዲ በዋሪ። ከሳሺናት ማይ ጩወ ሸንቀዩ ሌጠ እንዲ ኢገብእ ለእበ ትለክፍ ገበይመ አለቡ ሙናድል ረአሰ ማይ ውይብ ሌጠ ቤለ። ዲሽ አገር ሌጠ ኢኮን ቅዋት አጽዋር ክቡድመ ተሐዲሆም ቀሊል የዐለ። እት ጋድም ብራቁ ሞርታራት ወደባባት እንዲ ተክልክ እግል ትሓርብ ለጠልበ ፈራሰት አክልሚ ሕፍንተ እለን ሰለሰ ደባበት ሻሁድ ተን። ሰብአን ሐልፈ። አመ ህተን ትንፋሰ እንዲ ረክበየ ፈራሰት እግል ልሸሀደ ነብረ ሀለየ።

ሐቀለ 12 ሰዐት እት ጽልመት ሹሀደ። ጅሩሓም ወጽዋር እግል ለአፍግር ሐቲ ፈሲለት ናይ ሰለለ እንዲ መጽኣት እብ ሸሐግ እንዲ አቴት በክት ፈትሐት እሎም። “እለ ፈሲለት እለ እትለ ጽርግዩ ክልኤ



አሰይድ ዳንኤል

ዶል በክት ፈትሐት። እት ኢተትን ወሐርመ እት ክላሰትለ ሐርብ። ወህታተ ለበዝሐ እስትሸሃድ ለደፍዐት” ለሓኪ ሌ/ኮሎኔል ዳንኤል። ሳሊ ሀረሶት ሸሂድ ወጅሩሕ ክም አንበተው ለእት በሐር ወዐለው እብ አርወሐቶም ለነጀው እግል እቲ ወዐለ ምስሎም ጀሬሕ እት ረፍዑ ህቶም ወለልትረፍዑ ክሎም ማይ ልትጃቀቅ ምኖም ዐለ። ሸሂድ እንዲ በደ ምንክ እት በሐር እት ተሐዜ። ጅሩሕ እት ተሐዜ ጽዋርም እት ተአፈግር እት መብረህት ለኢትሰሚሕ ጽልመት ሐራሰ ለዐለ ተዐብ ለጀረበየ ሰኒ ምንመ ደልዩ ክልናመ እግል ነኣትዋይኖ እንቀድር።

ሐቀ ሰዐት ወሰር እት ሐቲ አካን ክም ተአክበው ሸሂድ ወሕያይ ፈረጎት ከብደ። ክሉ ገርቡ ጸዕደ ወግፎፍ ትመለኡ። አጋር ሐካይም እንዲ ፈትሾ ደለ ሰር ረክበው እቲ ምስል ህሉያም ወለኢረክበው እቲ ምስል ሸሂዳም እት ለአትካሩ ፋረገዉ። ሐቀሁመ ለሸሂድ ምንቱ ወለጅሩሕ ምን? ፈረጎት መሰኣለት ገኣት። ቅድረቶም ክም ወደው “ገድም ደሐንቱ ለጅሩሕ ሕክምን እግል ሊጌሱቱ ክም ሐየ ሆይ ኖሱ እግል ልትአመርቱ። ለሹሀደ ሆይ አርኒኮም ልትፈተሽ ክልትአመር እንቤ” ልብል ኮሎኔል ሕልቅሙ እት ትጸበዋ ምን።

ሐቀህ ለዐለት መብክለት ጽዒን ቱ። ምን ናይላ ጅሩሓም ለናይ ሹሀዳ አኪት። ሹሀደ ክም እክል ዲብ ሕድ እንዲ ትረሰሰው ትጸዕነው።

አየ ልትቀበሮ ወምን ልቅበሮምመ መሰኣለት ብዕደት ዐለት። ምን ሐር ለዐለው ሐዳይሰ እቦም ክም ልትቀበሮ እግል ኢልግበእ እት ሰልፎም እሊ ረአው ምንገብእ እግል ኢልደንግጾ ትፈረሀ። ለእት በሐር ወዐለው ሆይ እብ መሃየም ልቅበሮ። ምን ዲሽ እግል ኢትሰሐብ ሐርብ ለአተላሌ ሀለ። እት ደንገበ ምን ቅዋት አንፋር ሕዳም እንዲ ትፋገረው እት ሐቲ አካን ቀብረዎም።

“ለዶል ለኢትረክበው ዓጭሞታቶም ዕምቦብ በሐር ኡብቀሉ። ለሸረጦም። ለሸደዲቶም ለነጻላታቶም ምርጃን እብቁል ሀለ። ክሎም ሰቡላም ሰብ ምርወት አንሰ ልግበእ ወተብወት” እት ልብል ንኢሸት መትፋቀዲ ናይላ ዐመልየት ደግመ። ለክም ፋትሐይት መንገእት ለወሰፊየ መድህንመ እት ቀበትለ ለአተንሰዉ ለዐለው ሙናድሊን ግሲት ዐለት።

ሙናድሊት መድህን ብእሰ መርዴተት እት እንተ እት ዐደ ዐምኢ እንዲ ሐድገዩ ቀደመ ሚዳን ክም ፈግረ። ሐቀሁ ሰኮብ ኢትረክቤ አባይ ወለኣይኩ ዐድ ምን አምረረው እት ግርዝ ወለቲተ ዲብ እመ እንዲ ሐድገተ እት 1981 ሚዳን ፈግረት። ብእሰ ቀደም ፍግረተ እት 1978 እት ሕሩባት ሰምሀር ምን እስትሹድ ሕድ እግል ልርአው ግምባሮም ኢሀበዮም። ሰልፍ እት መድረሰት ሰውረት ክም መረብያይት ሰነት ሐቀለ ሸቄት እት 1983 እያም ሱቱር ወራር ዲብ ቅዋት ትየመመት። ሐዳይ አውረሐት እት ብርጌድ 23 ሐቀሁ እት ብርጌድ 44 ወሐር ክ/ ዲሽ 70 ብርጌድ 10 ዐለት። እት ብዙሕ ሕሩባት ሻረከት ወትጃረሕ ዐለት። ዲብ መኡልየትመ ማርሓይት ፈሲለት በጽሐት። እሊ እት ዐመልየት ፈንቅል ዲብ ከንቴባይ ለረክበየ ለቅም ሳኪን ለኩብደ ጅረሕ ለወደ እታቱ። ዕቅብ ተሐረጩ። ነሐረ ጥበ እንዲ ለከመ ትጀላጀዐ። መጸጸት ክል ዶል መለሆየ ክም ትገብእ ወደየ። ክሉ እንዲ ጸረት እት መዐስከር ደንደን አካን ክያጠት እንዲ ፈትሐት ምስለ ውዛረት ዐመል ወረዓየት እጅትማዕየት ለተሀይባተ ናይ ምስኩናም ሰዳየት መንበሮህ ትሳይር ሀሌት። ምስል ጀማዐተ እት ረአሰ መርኩብ ገናዲት ለበሐር እት ተዐፊ ነፍሰ እብሚ ትሸዕር ክም ሀሌት እግል ንትሰኣለ በክት ረከብነ። “ሕነ ሚ አኪት እኔ ፈድልል ዓጭሞታቶም እት በሐሩ ምርጃን ለኡብቀለ ወአንሶም ወተብወቶም ምስል እት ሐቲ ሕፍረት ለትደፈነው ሹሀደ እት ሰላም እንብር ሀሌት። ጋኖም ልስኩብ” ቴለነ። ምዕል ለለቀም አመስከነያተ እግል ትፍቀድ እነ ክም ትሰኣልናህ ሆይ።

“ለአካን ጋድመት ብራቀ ዐለት። ለባኮት ኪንቴባይ ዐቢ ወክንቴባይ ንኡሽ ልቡለ። ሰልፍ ለቀም ዎሮ እግል ክልኣት መልሂት መሐመድ ኣድም ወአበኩብዱ ምስል ረፍዐዮም። አምዳይቶም እት ዕጩት ለክፈዩ። ጅሩሕ ወሸሂድ እግል ንርፈዕ ክም አለብነ በዲር እዙዛም

ሕነ። አነ ሳኪን ነፍሼ ኢወዴት እዬ። እግለ አምዳይቶም እንዲ ትለቃቀምኮ ልጽሬ ወኢልጽሬ እንዲ በለስክዎ እቶም ሐደግክዎም ከትቀደምኮ። ዎሮ ምን ማርሐት መጅሙዐት ሺሻይ ገብረሃንሰ ለልትበህል ‘አፎ ኢትሸፍጊ እትነ’ ቤሌኒ ወዐሬክዎ። እለ እበየ ሐለፍኩመ? ምን እቤሎ። ከንዶእ! ቤሌኒ። እግል ትከሐድ ወቅት አለብ። የለ ደለ አነ ኪድክወ ኪዶ! ዲብ እብሎም ገበይ ሰኔት ክም ቡተክነ ለለቀም ተዐዴክዎ ክም እቤ ትፈርገዐ እኛ ወዲበ ወደቅኩ። ለሰርየት ክለ እዩ እንዲ ተዐዴት ሐልፈት። እት እዳዬ ለዐለ ክሹክ እቡ ደም እግል እክረዕ ለትቀደረኒ ወዴት ወጀማዐትኛ አሰክ ለሀርሱኒ ዲበ ጸንሐኩ። አካንዬ ናኢበት ማርሐይት ፈሲለት ለዐለት ሸሂደት ትርሓሰ ሰየም ጸብጠተ። ምን ሐር ጅሩሓም ለለሀርሶ ወሸሂዳም ለቀብሮ ክም መጽአዉኒ አሰክ ሕክምነ ረፍዐዉኒ። ምዕል ምን ኢተመት ፈድል መራዓየት ሐካይም ሆይ እለ አነ ለሐልፈት እግል እዳግም በክት ረከብኩ” ቴለነ።

መድህን ምስክናህ ክቡድመ ምንገብእ ህተ እግል ተአካብዱ ኢተሐዜ። ለሹሀደ ደሞም ሀድር ኢበደ ዌርሰት እት መብዳኦም እንዲ ሰብተው ሸቄ ምን ረኤት ዝያድ ክሉ በሰጠየ። ሻብ ምስውር ክብሮም ለሐሰት ሰረት እግል ልርኩብ እት ልትከላሽ ዲብ ማይ ክም ወድቀ እብ ነፍሱ እንዲ ኢገብእ እበ ከሚረቱ ምን ሀመ ለሹሀደ ለምን ነፍሼ ከላሽንዬ ልብሎ ዐለው ምን አፍቀደየ ዋርሳይ ቦም ትቤ ከትረየሐት እሉ።

“እት እለ ተምነው እነ እት ገማል እግል ንንምብር ምን ቀደርነ ዲመ ካብራም ልምብር። ላመ ሸባብ ለእለ ሐድገው እሎም ንዕመት ልትነፍዑ እቤ። ወእቦምመ ሕብንት አነ ዕምር ወዓፍየት ለሀቦም። ከዞን ጋሕቱላይ ረኤናሁ ህቶም ለዐመሮ ሀለው። ለእብ ሕሰይ ወደዓያት እንዲ ቀወው እትለ እግሎም ኢበቄዕ መካይድ ለሀለው ልብ ለሀቦም። ዮም ምድርነ ወበሐርነ ወዐስተርነ ሰላም እንዲ ትመደደት እቲ ክድመቶም ሌጠ ለሐዜ ሀለ” ትቤ መድህን።

መድህን ክም ክሎም ሙናድሊን ፋትሐይት ባብ አነ እንዲ ትቤ ኢትትፋወሽ። መስክንኮ እንዲ ትቤ ኢትጎምም ለተርፍነ እት ሐሰት እግል ትርአዩ ሌጠ ትተምኤ።



መቃበለት ርኢስ ኢሰያስ አፈወርቂ ...

ምን ገጽ 2 ለተላለ

ሰአል= ሓይሰ ርኢሱ ምን እሊ አርእስ እሊ እንዴ ይእንፈግር፤ ጸገም ሽዑብ ኤረትርያ እትለ ለተሐለፈት መደት ሰለሰ ጂል በህለት 80 ሰነት ከአፎ ትትጌምመ ወምን እሊ ወሐር ህዩ ከአፎ እግል ትግበእ በ ትብል፤

በሊሰ= “ለለአትፈክርተ። እግልሚ ምን እምብል፤ ምስል ካልእ እንዴ አትመጣወርን እግል ንርእዩ ብዙ። እሊ ኩሉ ዐዳዋት ወጽብኢት ከአፎ እግል ልሕለፋ ክም ቀድረ፤ ሕነ የምክን እት ቀበቱ ሰበት ህሌን ኢልትረኤን ገብእ። ለድድ እሊ ሽዑብ እሊ ለገብእ ዓዳዋት ወለትፈብረክ መሓለኪት እብ ክእሉሉ ምን እንርእዩ፤ ሽዑብ ብዕድ ወከህለዩ ገብእ፤ ለለአተብል ምስትንክራት ወዐጃይብተ። እሊ ህዩ እብ ፋሻት ወምከሐ እንዴ ኢገብእ፤ ሽዑብን ለአርእዩ ለኢተህንቀልቅል መዳፈዐት ሳብተት ቀላል ኢኮን። እትለን ለሐልፈዩ 20 ሰነት ለትረኤት መካፈሐት የምክን እብ ተጅርበት ለመጽአትተ እንዴ እምቤ እግል ነአመስምስ እንቀድር። እግልሚ፤ እሳት እግል ሐጺን ተአበቄዕ ክምሰለ ልትበህል፤ ምን ካቲመ ሓርብ ዐለም ካልኣይ ኩሉ ጅንሰ ጀርቤታት ዐዳወት ሐልፈ። ውሕደት ሳብተት ወመዳፈዐት ድቅበት እብ ከአፎ ትከለቀዩ እምቤ ምን ገብእ ሐር እግል ነአቅብል ብዙ። ሐቆ ካልኣይ ሐርብ ዐለም፤ “ሐርየት ወእስትቅላል ኤረትርያ እግል ናይ እስትራተጅየት መሰለሐትነ ኢትከድም” እንዴ ትበህል፤ እሰልፍ ክም ሀድፍ ለትነሰእ ለሽዑብተ። ከለ ናይ ወራር ሃዳፍ ዲብ ፍዕል እግል ተአውዕል ገብእክ ምን ገብእ፤ ሰልፍ ኩሉ ሐለት፤ ውሕደት ወመዳፈዐት

ወትፈንጥሩ ለተአርኢ ሰያሰትተ። ምናተ ለሽዑብ እብ ኤማን ወሰባተቱ ሐልፈዩ፤ ለረክበዩ ተጃርብ ሐለት ወደቅብ ሀበዩ። ሐቆሁ ዲብ መደት ግድለ ታሕሪር ለረኤናህ ሰያሰት ካፈሉት እብ አቃለም፤ ቀውምየት፤ ቀባይል፤ ድያናት፤ መናጥግ፤ ሐርብ ሕድ ወክላፋትመ ምን ገብእ፤ ሐልፈዩ። እሊ እግል ንሕለፍ ለትረክበ ተጃርብ ቀሊል ኢኮን። እሊ እግል ኖሱ እግል ሽዑብ፤ ሳሕለዩ ወአብቀዐዩ ድኢኮን ኢአግባሕዩ። ምን ዲብ መደት ሐርብ ታሕሪር ለዐለ ሕሩባት፤ እምበለ ዲብ መደትለ እብ ቅዋት ጎፍ ከደን ለልትዋሌ ንዛም ሀይለሰላሴ፤ ለዐለት መሓረበት፤ ለትደቀበት መዳፈዐት ለትረኤት ዲብ መደት፤ ዲብ መደት ንዛም ደርጊቱ እግል ኒበል እንቀድር። እግልሚ ደርግ 400.000 ዴሽ ዐለ እግሉ ልትበህል። እት ኩሉ ወራራት፤ ዐመልያት ዐስከሪ እግል ተሕሪር፤ ሴድያይ እንዴ አለብዙ፤ ፈርግ ሐለትነ ወጽዋርን ምድር ወሰመ እንዴ እንተ፤ እትሊ ሽዑብ እሊ ለጀረ ቅያስ ለአለቡ ለለአሽዐልል ጀራይም፤ ምን ብዕድ ለትረክበ ተጃርብ ክሉ እግል እሊ ሽዑብ እሊ ለቀለ ክብት ቱ።

እሊ እግል ኖሱ እግል ሽዑብ ክፋሐ እብ ዕጽፋት ክም ልደቀብ ውሕደቱ ክም ለአተርድ፤ መትፈናታይ ክም ሰቅቅ፤ ወዓዳት ወነባሪ መዳፈዐት ክም ለአሰብቅ ወለአወርስ እት ውድየት ሴምዳይ ወሴድያይ ዐለ። ምናተ እትለን ለሐልፈዩ 20 ሰነት ለትረኤ ለትዝመ ዓዳዋት፤ አትካሰሐት፤ መረር፤ ሐለት፤ ውሕደት ወመዳፈዐት እግል ትፈንጥር መትጸጋም፤ አትሀጎጋይ ሐለት አዳም ውብዕድ፤ ምነ ለሐልፈ ከይናት ወጽብኢት

ወውሕደቱ እንዴ ሐጠጠ ዱፋዕ ምን ኢገብእ ወኢትረክበት። እሊ ፈድል እሊ ህዩ፤ ናይ ሽዑብ ኤረትርያ ፈድልቱ። የምክን፤ መትነዛም፤ መትሰልሐት፤ ፍዕል፤ ከሊቅ ፈሀም ሕበር፤ ወጠንየት ዛይደት፤ ውሕደት ዳምቀት ውብዕድ እንዴ እምቤ እግል ንሽረሕ እንቀድር ላኪን ደቅብ ወመዳፈዐት ናይ ሽዑብን ለለአክድቱ። ከእትለን ለሐልፈዩ 80 ሰነት እሊ ውብዕድ ምኑ ለልትመክረህ መሐለኪት ጽብኢት እንዴ ሐልፋቱ እትለ ደረጀት እለ ለበጽሐ እምብል እንዴ ህሌን መትጃርጋይ ለአለበ ምስንትክር ለተአተብል ወለተሐብን ወተአሸንን መዳፈዐት ወፍርሰነት ቱ። እሊ ኩሉ እምበል ሰብቱ እበ ለኢወደዩ፤ እብ ፈብረክት መረር ወአትካሰሐት፤ ውሕደቱ እግል ትፈንጥር ወጠኖት፤ አድዐፎት ሐሉቱ፤ ዐንቀፎት ወሐለት ሄራሩ፤ ዘርእ ዐዳዋት፤ አትቃርሐት ነዐር ወፍተን፤ አሰክመ እምበል ዘንብ ሀድፍ ዐመልያት እርሃብ ገብእ እንዴ ህሌ፤ እንዴ ሰብተ ዳፍዐ ወሕሽመት ሰያይቱ አከደ። እሊ ኩሉ እግል ንሕለፍ ለአቅደረተነ ህዩ፤ ሐለት ወደቅብ ናይ ሽዑብ ቱ። እሊ ዓዳት እሊ ህዩ እንዴ ተሐፈዘ ወተአከበ ዲብ አጅያል እንዴ ልትሐላለፍ እግል ልምበር ለቡ ርዝቅ ቃሊቱ። ምን እለ ወሐር ዲብ እሊ ሽዑብ እሊ ለትኩበድ ሓጀት ህሌት እንዴ እቤ ይሐሰብ። እግልሚ፤ ምን እሊ ርዝቅ እሊ ለቀሌ ርዝቅ ህለ እግል ልትበህል ሰበት ኢልትቀደር”።

ሰአል= ሓይሰ ርኢሱ ዲብ ኢትዮጵያ እዳረት ሐዳስ ክም መጽአት ዲብ ዐድ ለዐለት ሰያሰት ተቅዩር አሳሲ ገብእ ዲብ ለህለ ትመሰል። ከእግል ልምጸእ ለቀድር ተዋልል ዲብ ሕሳብ እንዴ አቴኩ



ለሐለፍናህ መደት ሰለሰ አጅያል ላኪን፤ ሐያት መንበረት ወሀለዮት ክም ወጠን ወሽዑብ መደረት ትሰብብ ለጸንሐት ሓድረት ሓለት ኢትዮጵያተ። ሐድረት ሓለት ኢትዮጵያ ምን ቅሩብ ትከሰነ ወተምትመ። ትከሰነ ለበህለት፤ ዲብ ለኢቅድየትነ እዳነ ነአቱ ለበህለት እንዴ ኢገብእ፤ እምበል አሰባብ ለብቆት እም ሰበት ትመጽአን፤ ለዲቡ ለህለ መካይድ እግል ንራቅቡ ላዝምቱ። እሊ አዜ ዲብ ኢትዮጵያ ለህለ ሓድር ተዋልል ህዩ፤ እንዴ እርእዩ ለመጽአቱ። እሊ 20 - 30 ሰነት ለወደ አከይ-መካይድ እንዴ አርታዕክ እት ገበይ ለራትዐት እግል ትብለሉ ሽቅል ክቡድ ለለሐዜቱ።

እሊ ኩሉ ለትከለቀ ክላፋት አከይ-መቅሬሕ ሕዱድመ ሰያሰት ካጥየት ናይለ ለዐለ ንዛም ሐዳምቱ ለሰበበዩ። ምን ጽባቤሕነ “ኢፋልኩም” እምብል ዐልነ ላኪን፤ “እሊ ሐቅ ሽዑብቱ፤ እለ ዲሞቅራጥየትተ” ውብዕድ እንዴ ልትበህል ለሰመዐነ ኢረኩብዙ። ለዐለ አከይ-መካይድ ህዩ፤ ሐቅ ወዲሙቅራጥየት እንዴ ኢገብእ፤ ፈናታይ፤ ዘርእ ክላፋት፤ በደ እብ ሕድ-ሕድክ ወአትቃርሐት ፍተን ሌጣቱ። እግልነ ለከሰነ ምን እለ ወሐር ከአፎ ነሄርር ቱ። ምን አዜነ ሚ እግል ልምጸእ ክም ቀድር እንዴ አንተበህነ እግል ንታቤዕ ብዙ። እሊ አዜ ለህለ ተዋልል ኢትዮጵያ ህዩ፤ ለለአሰፈነ ጋራት ምንመ ህለ ዲቡ፤ ለክሉቅ ህለ አብካት ዲብ መሰለሐትነ እግል ነአውዕሉ ወእብ ገበይ ጣፍሐት ወርትዕት እግል ንዋልዩ ወጅብዙ። ሄራር ረዩም ለለሐዜ ጋርቱ። እት ቀበት ኢትዮጵያ ገሌ-ገሌ ለለአትናይት ምስዳራት ህሌ። እሊ ህዩ፤ እብ ናይ ሕበር መፍሀም ወካድም እግል ልተሌ ቡ። ተረትነ ህዩ እብ ለትደቀበት

እግል ተህሌ በ። ቀደም ወቅት እግል እትሃጌ ይሐዜ። ላኪን፤ ለጋር ዲብ ሰነት ወሰር ወክልኤ ሰነት ፍሬ ሻፍግ እግል ንትጸበር ምኑ አለብዙ። ሽብር-እብ-ሽብር፤ ሄራርነ እንዴ እንፈጥን፤ ራትዐት ወጭዊት እንዴ ነዐራቤ፤ መርበይ መሰለሐት ሕበር እንዴ ነሐፊ፤ እግል ሰላም ወመዓወነት እበ ለብናተ ሐለት ተረትነ ነአወፊ ጸንሐነ ወህሌን።

ሰልፍ ኩሉ እበ ናይ ቅዋት ካርጅ አትሻካት እንዴ ኢንትሀመል፤ ምስለ ዲብ ቀበት አቶብዩ ለህለው ወረኣይ ራቴዕ ለም ጀሃት እግል ንትሳዴ ላዝምቱ። እሊ ዳይ እሊ ህዩ ናይ አንፋር እንዴ ኢገብእ ናይ ሽዑብ ወራት ወሕርያንቱ። አሰክ እለ ዲብ ዐድ ለህለ አፍካር ብሹልቱ እግል ኒበል ይእንቀድር። እት ቀበትለ ዐድ ተዋልል ሰዱድ ወሕቡለክ ህሌ። እሊ እግል ትባሌሕ፤ ወለ ዲብ ለሐልፈዩ ሰነዋት ለዐለ ዘርእ መትፈናታይ ወአከይ-መቅሬሕ እግል ትምሐ ወቅት ወካድም ሕበር ትሩድ ለሐዜ። ለዲብ ቀበት አቶብዩ ለህለ ተዋልል ለሐባልክ ወለዐንቅፍ ለህለ፤ ለናይ ቀደም እለ ፍተን ለዘርእ ለፈሽለ ሐሽም ሐዳም ሰበትቱ፤ እብ ተአስትህል አከይ-አፍዓሉ ክም ለአክብ እግል ልግበእ ቡ። ላላእ እግል ነአፍሀምቱ፤ እግል ንምክሮምቱ ለልትበህል በህል ለሸቄ ሕርያን ኢኮን። ለፍገሪት ህዩ፤ ዲብ ደማንት ለበ ደረጀት እግል ትብጸሕ ወቅት ወጅሀድ ድቁብ እግል ልሕዜናቱ። ሓድረት ሓለት ጎርን አቶብዩ አዜ ዲብ መርሐለት ምህመት ባጽሐት ሰበት ህሌት፤ መትደጋግ ትሩድ፤ ወአጥፈሐት ገበይ ራትዐት ወዓድለት ለአትሐዜን። ከሓድር ተዋልል አቶብዩ፤ እት ለነሐዝዩ ሀደፍነ ወትምኔትነ እግል ንብጸሕ፤ እብሊ ለሸርሐኩሁ ወግም እግል ንፍሀሙ ወጅብዙ።



ናይለ ሽዑብ እግል ተአትሐውነን ብዙ። ለዲብ መደት እስትዕማር እንግሊዝ ለዐለ መካፍላይ አፍካር ባል ምን እንከሬ ዲቡ፤ ለሽዐ ቅወት ወሐደቱ ወመዳፈዐቱ እንዴ አትሐወንክ ከአፎ ትካፍሉ

ለትመክረህ ዐዳዋት ለትረኤ ዲብ መደት ቱ። እሊ ማሌ ቅሩብ ትረክበት ለእምቤለ ሰላም እግል ኖሱ ውለድ ወፍሬ ኤማን ወሰባተት ሽዑብ ኤረትርያተ። ህቱ ዲብ ሕሽመት ሰያይቱ፤ መብድኡ

ለትበጸሐት እትፋቅየት ሰላም ወመዓወነት ወዲብ መንጠቀትነ ወዐድነ ለህሌት እግል ተረት እብ ከአፎ ትሸርሐ፤

በሊሰ= “ሕነ ዲብ አምር ታሪክነ ምሽክለት አለብዙ፤ እትለን



አርሄት ወአዳሌት

አርሄት፡ አዳሌት ሕቼ! መርሐበ ብኪ! ከአፎ አስመንኪ፤ አላ. . .! እለን ክልኤ ሳምን ናይ ዕርፍ ሰር-ሰነት ክምሰል ክልኤ ሸሀር ገብአየ ዲብዬ ምንኪ ምን ትፈንቴኩ። ዕርፍ ከአፎ ሓለፍክየ፤

አዳሌት፡ ዕርፍ ሰኒ ሓለፍክወ፡ ምናተ ክምሰለ ትብሊ ለህሌኪ አናመ ሰኒ ፊመት ዲብዬ፡ ትሰፍለልኮኪ። አሰናይ ከማን ምን እሊ ወለዐል ኢፊመት።

አርሄት፡ አነ ዲብ እሊ ዕርፍ ምሰል ዋልዲንዬ አስክ መሰወዕ እንዴ ጊሰኩ ምሰል ሐውዬ ዲበ በሐር ሐመሰኩ፡ ወዲብ መሰወዕ ትዛወርኩ።

አዳሌት፡ መሰወዕ አክል አዩ ግርም ተ?

አርሄት፡ መሰወዕ ሰኒ ግርም ተ፡ ምን ግርመተ ወኬን ለተእሪካይ አካናት ከረ ስጋለት ቀጣን ወለ ታእሪካይት ደባባት ከረ ጃንር፡

ኮማንደር ወታይገር አርአውኒ ወሸርሐወን እግልዬ ዋልዲንዬ። እንቲ ህዬ እተየ ሓለፍክየ እሊ ዕርፍ፤

አዳሌት፡ አነ ከማን ምሰል ዋልዲንዬ አስክ ዐድ ኡብዕብዬ ጊሰኩ፡ አቦታቼ ወአብዕቦታቼ ርኤኮ ወምሰሎም ዐልኮ።

አርሄት፡ ከላሱ፡ ክሊን ሐንገልን ሰኒ ሕዱስ ዲብ እንቲ መድረሰት ካልኣይ ሰሚሰተር እግል ነኣንብት ተ አዜ።

አዳሌት፡ አይወ፡ አዜ ምን ናይ አወላይ ሰሚሰተር ወለዐል እንዴ ተረድኑ እግል ንሕፈዝ ተ። ለሐሰት ፍገሪት እንዴ አምጸን ዋልዲን ወምደርሲን እግል ንረዬሕ ተ። አማንዬቱ ማሚ አርሄት ሕቼ፤

አርሄት፡ ሰኒ አማንኪቱ፤ አነ ዛቱ ዲብ ዕሉም ሸወየ ንቀጥዬ ድሀር

ብህል ሀላ፡ አዜ እንሻለ ምሉእ ክም አመጺኢ እግል እክደም ተ።

አዳሌት፡ አነ ከማን እሊ ወድለ ፈሰልዬ ለሳሚ ልቡሉ፡ ንቀጡ አክልሕድ ክምሰለ ናዩ ሀላ። ዲብ እሊ ሰሚሰተር እሊ ምሰሉ ጅግረ ትርድት ህሌት እግልዬ፤ ክሉ ረኣሱ እግል ልሕለፈኒ አለቡ፡ ረቢ ልሰዴ በሊ።

አርሄት፡ አቤ አዳሌት ሕቼ፤ እሊ ጸብጣመ ለህሌን ስለል ነጀሕ ሰኒ ወአማን እግል ንተረድ ዲበ ወጅቡ። ዋልዲን እግልን ለትትቀደርም ወዱ ህለው፡ ሕን ህዬ ፈኮም እብ ነጀሕ እግል ንፍደዮምቱ ለአስትህለኩ። ከረቢ ልሰዴን እንሻለ።

የለ ኒጊስ ጀረሰ ትዘበጡ፡ ዲብ ሴር ንብጠር ወነሺደት ወጠን ንንሸድ። እንቡተት ኬር ወበርከት ትግበእ እግልን እንሻለህ።



አጥዐሚቶ

አድም - ዓፈ ወልዬ፤ ገድም እንሻለ ምራድክ እት ሰኔት ርኩብ፤ አነ ትሳፊት ወተዓፊት፤ ዲብ ሕክምናታት እት ተኣነገጌ እብዬ ጀረሰኩክ፤

ዓፈ - ይበ አነ ዋጅብዬ ወዴኮ፤ አሰናይ እንቲም ተዓፊኩም፤

አድም - አዜ ገድም ሳርሐኒ ዐድ እግል ኢጊሰ፤ ክመ እሊ ቃዊ ይህሌክ፤ ገርሀት ወንዋይ በኑ ህለ፤ ዐድ ሕጉዝ ተ።

ዓፈ - ሕን ላቱ ተዓርፍ ወፈቱ፤ አስክ ሰኒ ትተረድ እትለ ምሰልን ምንዲ ትጸንሕ ወሐሴ። ሐቆ እገደስ ትቤ ህሌክ እንሳርሐክ፤

አድም - ሳርሐኒ ሌጠ፤ አዜ እንዴ ይእገደስ ለአጀኒት ትላከዩ እግልዬ፤ እሰላመት እግል ኢበሊ። ለአሰማዮም ኢትጸበጠ እግልዬ ጠይእቡክ።

ዓፈ - ደሐን እትላከዮም እግልክ፤ ማጅድ፤ ያሰሚን ክልኩም እንሰር

ንዑ።

አጀኒት - ሰኒ፤ ሰኒ እንመጸእ ህሌክ።

አድም - አዜ አሰማዮ ኡትአምረኒ፤

ዓፈ - እሊ ማጅድ ልትበህል አድም - ማጃጅ፤

ዓፈ - ማጅድ አድም - ናድድ!

ዓፈ - ማጅድ ልትበህል ይቡ፤ ከአፎ ትረክቦ ህሌኩም?

አድም - እዘም ምኑ እሊ፤ ለብዕዳም አሰእለኒ

ዓፈ - እሊ ያሰሚ ትትበህል አድም - ሳለሚን ትቤ፤

ዓፈ - ያሰሚን አድም - ያሰሚን፤ ቅልወላሐድ ትግበእ እትከ ለአሰማይ እሊ፤

ዓፈ - እላ ህዬ ጀዋሂር ትትበህል አድም - ጀማሂር! ገድም ገበይ ረቢ፤ ጀማሂር ላተ፤ ሰሚት ተእሪክ ተ፤ ጀማሂርና ለቀዳም አዳም ነዝም፤ ወለአደርሰህ ዐለ

ጠይአቡኩም ዓፈ - ይበ ጀማሂር ኢቲበል ጀዋሂር በል

አድም - አነ ጀማሂር ብህላ ህሌኮ፤ እሊ ህዬ መን ልትበህል?

ዓፈ - እሊ ምርዋን ልትበህል ይበ

አድም - ያለጠፍ! አሰማይ ከለም! ወለት ዕርዋን ትቤ! ወለት ዕርዋን

አምረ ህሌክ?

ዓፈ - ኢፋልዬ

አድም - ወለት ዕርዋን ጀባቢት ተ፤ እግል ከራይ ትትበህል።

ዓፈ - ወለት ዕርዋን ኢኮን፤ ምርዋን ተ፤

አድም - ክሉ እሊ ሐቱ ተ፤ ምን ወለት ዕርዋን ወኬን ሰሚት ኢርኤኩም።

ዓፈ - ይቡ፤ እንቲም ኢትጸበጠ እግልኩም እንድኢኮን እሊ አሰማይ

ዋወር ተ።

አድም - እሊ መትጠዋር ኢኮን በዳ ተ። አዜ ጠይአቡክ፤ እሊ

አሰማይ እሊ እንዴ አዘምከ ምኑ፤ አሰማይ ዐድ አቱ እቡ ሀበኒ።

ዓፈ - አሰማዮም ህቱ ተ፤ ዲብ

ሸሃዳት ሚላዶም ለህለ ህቱ ተ።

አድም - እሊ አሰማይ እሊ ላተ ዐድ እግል ንኡቱ እቡ ይእንቀድር፤ ኖሰዬ እግል እሳሚኩም ተ። እንቲ ሰለመት፤ እንቲ ህዬ በኪተ፤ እንተ ወለት ዕርዋን እንዴ አዘምከ ምን ዕሰማን፤ ወእንተ ማጅጅ እንዴ ተሓገልካህ ሓምድ፤ አነ ክእነ ሰሙይክም ህሌኮ።



አድም፡ ግረ እሊ ለትወሉዱ አጀኒት ህዬ፡ አሰማይ አብዕቦታቱ ወአቦታቱ ልፍሀሙ እቡ ሳምዎም፡ ትሰምዐኒ ህሌክ ማሚ፤ ገድም ሳርሐኒ ጣይአቡክ።

ዓፈ - ጠዋሊ ይቡ ደሐን ለሀበኩም፤ ተሐፈዙ።

ይማዩ

እም መርበይ ሐያት ውላደ ክምሰል ተ ክሉ ለለአምሩ ጋር ምንማ ተ።

ፈክ አክልሕድ ክምሰለ ናየ ለፈድየ መክሉቅ ላኪን በታተን የሀለ። እም ውላደ ትፈቱ፤ ውላዳመ እግለ ፈቱ። እም ምን አጅል ሐያት ውላደ ዲብ ክል ሕፍን ወመራር ተኣቱ። ውላደ ዲብ ሐያቱ ምንለዐል ክሉ እግል ልግበእ እግለ እብ ክለ ሐለተ ትከድም። ሓይስ ሰናቱ እንዴ ገብአ ዕዉት ዶል ትርእዩ፤ ለዶል እሊ ጋነ ሰክብ ወረቢህ ተሐምድ። ረሐ ግረ ውላደ ተዐልበ። እም ለቀሌት ህያብ እግል ውላዳ ተ። ይማዩ እንሻለ ፈኪ እፈዴኪ ልውዴኒ!



ሐካኪቶ አውኪር

በሰር ወድ-ሐሽል


መደት ሐቱ ሐየት ወከራይ ምሰል እግል ንዕየ ትብገሰው። እት ከደን ወኣት ውብዕራይ ረክበው። ሕኔት እተ ዶሎም በልዕዎም። እግል ልተወደም ሰበት ሐዘው ሸፍር ዔረው እቦም። እት ሕድ እንዴ ሓበረዎም ህዩ ከራይ ተአውዕሎም ዐለት።

ሐቆ መደት ለወኣት እግል ትውለድ ዶል ቀርበት ሐየት “ዮም አነ እግል እትፈረር እንቲ ዓርፈ” ቤለዩ። ከራይ ዓረፈት ወሐየት ትፈረረ። ለወኣት ህዩ እጋል ወልደት። ሐየት ዝልም ሰበት ሐሰበ ለሰሌት ዲብ አንገብ ብዕራዩ ወደዩ፤ ምሴ ክምሰል ዔረ ህዩ፤ “ዮም ብዕራዩ እጋል ወልደ።” ቤለዩ። ከራይ ሰኒ ፋርሀት እት እንተ፤ “ረቢ ፍረህ ብዕራይ ኢወለድ” ተለተ።

“አፋኪ ጸብጢ፤ እግል ይእርገሐኪ፤ ብዕራይ አፎ ኢወልድ። እሊ ኢኮን ለሰሌት ዲብ አንገብለ ብዕራዩ። እንዴ ቤለዩ እግል ልቅተለ ሐዘ። እተ ህዩ እንዴ ፈርሀት ትም ወዴት ምኑ። ምናተ፤ ለቴለል እግል ሐሽል ደግመቱ።

አምዕል ሓሪት ሐየት ክም አመሉ፡ ብዕራይ፡ እጋል ወለወኣት እንዴ ነስኦ ትፈረረ። ከራይ ህዩ ምን ቅብላት ትገንሐ ወዐለት። ፈጅር ሓሪት ሐየት ወከራይ ምሰል እት እንቶም፡ ሐሽል ምን ሐሊብ ሀወት እንዴ መልኦ እት ገንድል እበ ጀፈርምም ሐልፈ። “ዮም አየ አመምከ፤ አፎ ክእነ ገንደልከ፤” እት ልብል ትሰኣለዩ ሐየት። ሐሽል እት ልትሰሐቅ፡ “ሊሊት አቡዬ ሕጻን ወልደ፤ ከእግል ሕርሱ ለገብእ ሐሊብ እንዴ ነስኦ እገደስ ህሌኮ።” ቤለዩ። ሐየት እት ልትፈክር፡ “ጊስ ሐሳይ እናስ ሚ ዶል ወልድ! እግል ብዕድ ቅሸሽ” ቤለዩ። ሐሽል ስጋዱ እንዴ ነዋ። “እሊ ምን ገብእ እናስ ሐቆ ኢወልድ፡ ብዕራይመ ኢወልድ፤ ከራይ እጋለ ሀበ” ቤለዩ። ሐየት ሰበት ትፈድሐ ሓርቅ እት እንቲ፤ ሐሽል እግል ልቅተል እብ ሰዐይ ትጠለቀ። ሐሽል ህዩ ርሐ እግል ለአፍግር ክባባይ ገብኦ።

ሐቆ እሊ ሐየት እብ ሀመሌ (ሀሳይ) ሐሽል እግል ልቅተል ሐዘ። ባካት አመቅረብ እት አፍ ግብ ሐሽል እንዴ ትገሰ ትጸበረ። ሐሽል ፍሩር እንዴ ዐለ እት ቤቱ ዶል ዔረ፤ ሐየት እግል ኢለሀሌ ሰበት ትሸከከ፤ “ቤቼ ሰኒ ማሰዩት።” ቤለ ምን ረዩም። በሊስ ክምሰል ኢሰምዐ፡ “ዮም እሊ ቤቼ ክምሰል በዲረ ይህሌት፤ በዲር ሰኒ ማሰዩት ሐቆ እብለ፤ መርሐበ ትብለኒ ምን ዐለት፤ ሚ ጀሬት እተ፤” እንዴ ቤሉ ምን ሐዲሰ፡ “ቤቼ ሰኒ አምሴኪ።” ደግመ። ሐየት ህግዩ ናይለ ሐሽል ሰበት ሰምዐ፤ “መርሐበ እንተ ሰኒ ማሰ።” ቤለዩ እበ ክርንቱ ለዕክት። እሊ ዶል እሊ ወድ ሐሽል፡ “ዮም ላተ ቤቼ ቤት ኢገብኣኪ፤ እንተ ህዩ አምርክ ህሌኮ፤ እዩ እግል ትቅተል ኢትጀርብ፤ ለከራይ እጋለ ሀበ።” እንዴ ቤለዩ ገርቦ ምኑ። ሐየት ገድም እብ ክሉ ሰበት ተሐለለ እግል ከራይ እጋለ ሀበዩ ልትበህል። መታክል እብ በሰር ልትባለሕ።



ድብዕ እት ሰዶሐት



ጽርግዩ ሰሜናዊ ባሕሪ

ዕጩ ይጋምል አው ድብዕ ዲብ ዘበን ቅዱም ኤረትርያ ግልብብቱ ለዐለት ምንግቱ፡ ሐቆ ዘበን እሊ ድብዕ እሊ እት ሰርት ጌላ። ድብዕ እት ተቅዩር ሓላት ጀው፡ እት ስሕብት ዝላም፡ እብ በራደት ድዋር ዲብ አንሰሶት ሔዋናት ከደን ክምሰልሁመ ሰራይ ዕንታት እንዲ ገብእ እግል ትርአዩ ለልትትዮት ዎሮ ምን አርዛቅ ጠቢዐት ዐድናቱ።

እት ኤረትርያ እትሊ ለህሌነ እቱ ወክድ እብ ድብዕ ለተገልበበ ምድር ርሒብ ምንመ ኢልትበህል እት ገሌ ድዋራት ኤረትርያ ሀለ። ሰሜናዊ በሕራ፡ ደቡባዊ በሕራ፡ አዋራፍ መሓዛት ጋሹ፡ በርከ ወዐንሰቡ። ርረ በቅለ ወማሬት፡ ገሌ ምነ እብ ድብዕ ለተገልበበ እንዲ ትበህለ እግል ልትሀደግ ለቀድር ድዋራት ዐድና ቱ።

እሊ ድብዕ እሊ ዲብ ዳይመት ሓለቱ እግል ለአቅብል ወክምሰል በዲሩ ሔዋናት ከደን ለፈሬ ወልተውብ እቱ ጀላብ እግል ልግበእ እንዲ ተበህሉ፡ እብ ሕክመት ወሸዐብ ኤረትርያ መርዲት ገብእ እሉ ምንግቱ። ገሌ ቃውያም ላኪን አግዱባም እንዲ ሰሐለው ወምን ዕንታት ብዕዳም እንዲ ትሔገው ገማል ለደምሮመ ኢተሐገለው። እብሊታት ቱ ህዩ ገሌ አካናት ሕሩም ሕዝቦት አው ቀተሪ እንዲ ትበህለ ፍንቱይ መርዲት ወዓቅቢት ለትጉበእ እሉ።

ድብዕ ሰሜናዊ በሕሪ

ሰሜናዊ በሕሪ ምን ብሎት ባጽዕ ቤትገርጊስ እንዲ አምበተ እብ ብራር-ብራር መዳንን ዐዲ ንፋስ እንዲ ወደ እብ ምፍጋር ጸሓይ ኳዜን እብ ምቅልቃል ምክኤል እንዲ ሐልፈ እብ ድብሬ ፍሩስ ምሰል አድብር ምራራ ለልትራኩብቱ። ሄራር አስክ ሰሜናዊ በሕሪ ምን መዲነት አስመረ እብ ብሎት ከረን እንዲ ፈገርከ 21 ኪሎሜተር ሰረጀቃ ክምሰል በጽሕፎ ድማን ትጠወ ከእበ ሐዳስ ገበይ ሰረጀቃ ሸበሕ አስክ

ቅብለት ምፍጋር ጸሓይ ትሄርር። እግል እሊ እብሊተትዐጅብ ብሰር ለትሸቄት ገበይ እንዲ ተአልበዋክ ዲብ ተሄርር ወምነ ርራብ እንዲ ኢትደንን አሰልፍ ለትትከብተክ ዐድ ወኪ ትትበህል። ምን ወኪ ክምሰል ሐለፍክ አስክለ ናይ ምፍጋር ጸሓይ ሐሰያት ገጽከ ተሐት ተአድሮሬ። ሐቆሁ ምን ዐናጉሌ ገጽከ ተሐት ክምሰል ደንክ ለሉዉሊት ገበይ እበ ገጽከ ተሐት ዲብ ትትለዋሌ እግል



በቅለ ሰነት 1933

ድማን ወድገሉብ እብሊትፈናተ ጅንሰ ዓጩይ ለተገልበበ አድብር ወአውደግ ዲብ ተዐፌ ምሰለ እብቀበት ድባዕ ለተአሲርር ግርም ገበይ ወምሰለ ጨቅ-ጭሪቅ ለልብል አክራን ሰራይር ነላት ውበዕድ ሔዋናት ከደን ዲብ ተዐፌ ለሰፈር ነፍስ ትፈዩ ወኢልትመሸግ።

ዐናጉሌ እንዲ ሐለፍክ ዲብ መሐባር ፍሽይ-ምራራ-ሺሻዮ ትበጹሕ። ለአስክ ፍሽይ ለነሰእ ደርብ ናይ ጨበል ገበይ እትጉበእ እብ እምባልቆ አስክ ፍሽይ ወዳንኩር ትበጹሕ። ለአስክ ፍልፍል ሰለሙነ ለለአተላሌ እብ ቅዋራን ለትለበክ አግደ ጽርግዩ እንዲ ጸበዋክ ለእብ ጋምል ዕጩይ ለተገልበበ መግእ ተሐልፍ። ለደዋይሕ ሰኒ ጀላብ እግል ትትፈረጃ እንዲ ትቤ ዲብሊ ወቅል ዕንክለት እንዲ ፈገርከ ድማን ወድግሉብ ቀደም ወግረ ዶል ተአትቃምት ለለትዐጅብ ምድር ክሉ እት ቀደም ዕንታትክ ልትረኤኩ። እግል መሰል ለምቀደም

አስክ በሐር ቀዩሕ ለልትመደድ ጋድሞታት ሸዕብ ወወቂር፡ ለእብ እንክር ድገሉብ ለህለ ከረ ፋጌክ ፍሽይ ወድብር ምራራ፡ ድብር አበማይተ እብ ድማን ህዩ ድግሳክ ግራት አውሌፊ፡ ርእሲ ዐዲ ወድብር ቢዘን ተአተቅብል።

እሊ ድዋራት እሊ እብሊ እት ብዕድ አካናት ዐድነ ለይህለ ጋምል ዕጩይ ለተገልበባቱ። እሊ ዕጩይ እሊ ክምሰል ከረ ነረድ፡ ወግሬ፡ እርግቱ፡ ዐጋም ሻዋት፡ ጸሐት፡ ዳዕሮ፡ ሸግለ ተሰሰ ወለመሰሉ ለተገልበበ እትጉበእ፡ እት ቀበቱ ለትፈናተ ጅንሰ ሔዋናት ክምሰል ከረ፡ ነላት፡ ዲዋር፡ ቀናዲ፡ ወዓጌ፡ ዕንሬት፡ ገሓያት፡ መነትል፡ አወንን፡ ሐሻይል አከሪት ክምሰልሁመ አሰህሎታት፡ ወአራዊት እብ ብዝሐ ነብር እቱ። ምን ጅንሰ ሰራይርመ ክምሰል ከረ ነሰር፡ ክቤራ፡ ከራክሬ፡ ሓጉል፡ ወለትፈናተ ነኣይሸ ወዐባዩ ሰራይር ዲብ እሊ ድዋራት እሊ እብ ብዝሐ ሀለ።

ሄራርከ ሰድ ተአተላሌ እብ ዕንባባታት ወረያይም ጋምል ዓጩይ ለተገልበበ ድዋራት ሳቡር ትብጹሕ። ምን ሳቡር ለትረክበ ለምግባይ ሓላት

ምን ሐልዩት ዐድ ትማርያም ባይራይ ወድ ረድኢ ሓሁ እብ ሰንቡእ በዳት ከለውላዱ ህዩ ቤለው፡ አዜ እሊ በደ እሊ ከራዩ እንዶ ዘምተተ ምን ተአበድዮ ምሕልልነ ወትረኡ፡ ለሂጋሆም ክም ሰምዐ እሊ ሐላ።

ትወዲ ነብረት በዲርመ ኢትወዲ ዲብ ሚ ትቡለ ለእዲ ሕሚደ እብ ጸነብል ኣሱረ መጢቀ ወለሕቃነ ባርደ ወለውዱረ ዐረድ ኩሉ ትወዲክ እብ አውጀህተ ወዓሙለ እት መሐበር ተትሃጌ ለእለ በልሰ ቀቡለ መርዳይት ትትከኔ ዐገበ እንዶ ሻኩለ ክሳር እት ረቢተ ገሮብነ ቤተ ሰፍሉለ።

መሐመድ ወድ ዐምዴስ መንሰዓይ እት ቅብላተ ለቤሉ፡ ሰኒ ቤለ ወድ ረድኢ እግል ሚ እግልኪ ወአውሐደ ታባዩ ነሰኣዩ ትቀውሐ ዲበ ወጠዐሰ ነፍሱ ትፈቅደ እላዲ ክልዶልተ ለለውቀተ ዶል ለሐሊበ ሱብኣ ራግእ ክም ሰተ ዶል ለአዳራር ጋሻዩ ለዋቀሎት ለሕሰበተ ሸክል ለአምቱደ ዲብ አንሕርተ ትዋተደ ኢጸግብ ምነ ለኢበልዐ ወኢበርድ ምነ ለኢሰተ ዐግል ሕመድ ለሐምዶ ክል ቤት አክል ሐለተ ወእንሰ ዐሊ ለሐምደ እንሱሳተ አሰፈደ ኤሻትዲ ክሉ ለሐምደ ረትዕ ዲበ ምን በደ አዜመ ህሌት ትትዓየሽ እብ ስጋህ ወመኣሰ ፈጅር ለትመጽእ ኢነአምር በዐልዩ ወዲ ክም ፈተ ሰለሰ ዐድ ሙሼ ከበተተ ከበሰ ጌሰት እብሊ ኤማነ እምበል ትፈግር ዑረተ እት ተትሃጅኩ መሕበረ ወእት ተአሰሕቁ ለትሰሐቀ ፋግር እንቱ ለአምዲተ ወሰጡር እንቱ ለድመቁ።

ደቀምሐሬ ትበጹሕ።

እሊ ምን ገሕቱላይ ገጽከ ለዐል ሐቆ አተንኩብኩ። ምን ገሕቱላይ አስክ ሚነትነ ባጼዕ ሐቆ አመምክ ላታ እበ ወጡይ ጋድሞታት ከረ ድግድተ፡ ማይ-ጣል ወደገሊ እንዲ ሐለፍክ ዲብሊ ሉለት ፋግረት ምን በሐረ ለትትበህል ሚነትነ ባጼዕ ጠበሽ ትብል። ወእብሊ ለሄራርከ አስክለ ለእለ ሐዜክ እትጃሃት ዐድ ወካርጅ ትወጅሁ።

እብ ሰበት ድብዕ በቅለ ወማሬት ህዩ ሚ ተአምሮ?

በቅለ ወማሬት ክልኤ መንጠቀት ዲብ ርረ ሐባብ እት ገበኦ፡ ምን መዲነት ነቅፈ ጀህት ምውዳቅ ጸሓይ እት መሳፈት 35 ኪሎሜተር ራይማት ለህለያተን። እለን ክልኤ ዳሕዩት ዝያድ ሰማን አልፍ እብ

ሐርሰ ወርዕዮ ለልትናበር ሰካን በን። ለሮረ ሐባብ ምን ዘበን በዲር ለልትአመር እቡ ዕጩይ ህዩ ግልብባት ተን። ነረድ፡ ወግሬ፡ ተሰሰ፡ ዐጋም፡ እርግቱ፡ ሻዋት ወለመሰሉ ዲብ ረወሪት፡ ለሸም፡ አውሐ፡ ቅልንቃል፡ ጸሐት፡ ጸሮብ፡ ውበዕድ ህዩ ዲብ መድሀር ለበቅል ዕጩይ ቱ።

እት ዘበን ሕክም ጢላን ዲብ ርረ በቅለ ሐቱ ማሸን ዕጩይ ለትባትክ ወትጸርብ እንዲ ተክለ፡ እግለ ግሩም ወሮማይ ዕጩይ ነረድ እምበል ገበል ዲብ ባትኩ ጋድሞታት እንዲ ወደዩ እብ አብቁል ወእንሰ ክምሰልሁመ እት መርኩብ አዳም አስክ ነቅፈ ደንኩ ክምሰል ዐለ ልትሀደግ። ልትሀደግ ሌጠ እንዲ ኢጉበእ፡ አልወክድ ለህይ እብ ማሸን ለትባተክ ነረድ ወናሰ ለማሸን አስክ እለ አሰረ ዲብ ርረ በቅለ ሀለ።



ሮረ ማሬት 2018



ሕዱግ ሰሌማን

ሰ አ ሰ

2^ይ ወናይ ደንጎበ ክፈል

ሐሊትን ፍክርናቱ እብ ቅድረትን ነኦምን
ኖሰን ንትበገስ እንሰትት ወነዐልን
ቤልው ኢንተሌ ፍክር ወፍዕል እንቃርን
መተንኮብ እትኖሱፍንቅል እብኪ እንሸንን።
ሐር ከዋ ስያሰት ለፍክር ራትዕ
ኖሰን ነኦልፈ ወኖሰን እንሰንዕ
ረዩም ኢነአኖኬ እግል ናይን ነኦገንዕ
ሰዳይት ኢነሐዜ ኖሰን ነዐምር ወእንዳፍዕ
ረኣው መዲነት ባጽዕ ለዔፍያየ ትትግንዕ።

ሐሊትን አማንተ ለቀጠን መራር
ፋታይን እብ አማን ንታለዩ እግል ራትዕ ሄራር
አማን ገበይናተ እግል ዳፍቶት ምን ወራር
እሊ ፈንቅል መንገሉት ዐቦት ቱ ወዐማር።

ታሪክ ፈንቅል ብዙሕ ዐለ መጻግም
ሐጠር ለአወርሰን ምንግም እትግም
መታክል ሐለፍን መራር ወዋዕም
ክትር ሰብር ወኤማን ቀዳሚትን እንዳግም።

ታሪክ ፈንቅል ለገቢልን ሐበነ
ፈታን ምስልን ፈርሐ ወሰነ
አርዛቅ ፍንቅል ምልእት ሀሌት ለወደን
ግራይን ምሉእ ክም ምራድን ሐንፈልን
ጢሾን ክሪት ለመሐበርን ዐገነ
ታሪክ ፍንቅል መርጀዕቱ እግል አጅያልን
እብ ሰሜትኪቱ ፍንቅል ለምህሮትን ሰደድነ።

ገለድን ነሐድሰ ወንሰደዳ ለምህሮት
ጭዊት ነኦርትዕ ነናሰት እግል አትመሞት
ያብሰት ነዋልል ዕብር እግል አግመሎት
ቃዊ ነዐልም እግል ተጠውር ወዐቦት።

እትጀላብ ፈንቅል ለምህሮትን ንሰደደ
እት መሸንገልን ሀሌት ለእማንት ሹሀደን
ንዕቀብ እለ ወጠን ሐናቱ ውላደ
ሐቱ ለሰቅራት ወኦሮት ለምድጋ።

እብ ሰሜትኪቱ ፈንቅል ለገለድ ነኦቱ
እግል ክለ ለወጠን ነዐምር ወእንበኔ
ፈንቅል መስከብ ሓዩት ወለ ሐራሰ ገመኔ።
አቤ ፈንቅል ታሪክ ስሙድ ወአርደት አብጣል
ዐገልኪን እብ ሕበር ዲብ ጢሾለ መትሐዋል
ውሕደትቱ ታሪክ ፍቲ ወመትሐባር
ታሪክ አውረሰኪን እግል ሐዲሰ አጅያል።

ዔማት ርዝቅ እንቲ ለምን ክል እንክር ወሩደ
ሶሚት ታሪክ ለዲብ ክልወድዕ ሰሩዳ
መንገሉት ዐቦት ለእብ ሐዳረት ለሐሙደ
ሻከት አሰል ለምን ርሕም ሞሉል ወሉደ
ዕጭት ደዕሮ እንቲ ለጋምለት ወሳብት አቅሩደ
ፈንቅል ታሪክ ሐበን ሰብ ፍርሰነት ፈቁደ።

ታሪክ ፈንቅል ታሪክ ለእበ ሐበኩ
ልሸህድ እሊ ምድርን ዕጨዩ ወለ እበኩ
ታሪክ ፍርሰነት ምን ልትዓደሉ
አይወ፡ ታሪክ ፍርሰነት ምን ልትዓደሉ።

ምደርሰ አሳሰ ሀለዮት ምጅተመዕ

ዲብ ህንድ ‘ጅን ሐቆ ትወለደ ቀደም ረቢ ምደረሰ ረክቡ’ ለልብል ብሂል ሀሌ። ልግበአመ አንዲትን ጅን ክም ወትወለደ አወል ለክልቀዩ ረቢ ረክቡ መደርሰ እንዴ ኢገቢእ። ምን አሊ ብሂል እሊ ለነአክደ ምን ተህሌ አሀምየት ምደርሰ አክለአዩ ክም ተ ለአክድ እግል። አካን ምደርሰ አት አዩ ምጅተመዕ አክል አዩ ዐባይተ እግል ኒበል ሰበት ሐዜናቱ። ተጠውር ምን አየ ትበገሰ? ምሮ ምጅተመዕ ምስተቅበሉ እግል ልሰኔ ወ ልእኬ አት ምን ልተንኮብ? ምደርሰ ታክየት ናይ ምሮት ምጅተመዕ አው ደውለት ቱ። ሰበት አሊ አሀምየት ናይ ምደርሰ አት አዩ ምጅተመዕ ምለዐል ኩሉ ተ። ምሮ ፈላሰፈ ‘ናይ ፈጅር እድዝዩ እት ናይ ዮም ምደርሰቱ ለትትወለድ’ ልብል ዐለ። ሰበት እለ ዋውር አብ ክሉ ሸዐበ እብ ዐድል ወመሳዋት ለነብር እተ ደውለት እግል ተህሌ ሸባበ እብ አደብ ምን መደርሰም ዕልም እግል ልጃቅፎ ህለት እግሎም። ምደርሰ ለክም ወረቀት ጸዕደ ሐንገል ናይ አዋፋልክም ምራዱ ከትብ አቱ ወፈሀም ወፍክርየት ሸባብመ እግል ልቀይር ቀድር። ፍክርየት ሸባብ እንዴ ቀየረ ክም ምራዱ ገበይ እግል ለአንሰኦም ቀድር። ምን ለእንፍህሙ ምንለ ሀሌ፡ ምስተቅበል ሸባብ እት ምደርሰ ሐቆመ ለተንኮብ ገባኦ፡ ምስተቅበል ደውለትመ እት ሸባብ ሰበት ለተንኮብ፡ አካን ምደርሰ እት ምጅተመዕ ዐባይተ፡ እት አሮት ምጅተመዕ አው ሐቱ ደውለት አካኑ ሰኒ ምህም ተ። እት አሮት

ምጅተመዕ መደርሰ ለለመጽኡ ተቅዩር እግል ሰኔት ልግበእ ወ እኪት ትሩድ አሳሰ ለቡ ወ እግል ክሉ ነፈር ናየ ምጅተመዕ እግል ልሸመል ለቀድር ለለትሐዜ ጋርቱ። ደረሰ ምን ምደርሰም ሸቅል፡ ረሐመት፡ ፈተ፡ ሕሸመትሕድ፡ ነፈሰከ ቀዳር፡ ደማነትኖሱ እሕትራም ዐባዩ፡ ውበዕድ ክሉ ዲብ አዲነ ለንሸንሁ ምን ምደርሰ ክም ልትወረስ ክሉ ለለአምረ አማን ተ። ምለዐል ክሉህዩ ህቱ ለወድየ ወዱ ወኦደቡ ደርሶ። እብ ክሉ ፈደብ ለቱ ምደርሰ መሰል እግል ክሉ ደረሳይ ወምጅተመዕ ሰበት ቱ ፍቱይ ገበኤ። ደረሰ ምደርሰም ልወድየ ወዱ ወ ኦደቡ ነሰኦ። ክም ሰልሁ ከትቦ ወቀረኦ ። ደረሰ ነኦይሸ እት ህለው ሕሳቦም እት ምደርሰም ልተንኮብ ወ ዲብ መስተቅበል በርናምጃቶም ለሐሰቦ ወገሙ። ሰበት አሊ ምደርሰ ፈዳብ አብ ክሉ መሰል እግል ልግበእ ወጅብ። ሰበት እሊ አወልናይ ጠለቡ፡ መተኣኦድ መስተቅበል ለአመርዴ። አብ አምር ልግበእ ወአብ ተጠውር። ክምደር አሳሰ ምስተቅበ ሀለዮትን ለለአክድምቱ እግል ንፍሀም ወጅብ። ሰበት እሊ ተጠውር ናይ ሐቱ ደወለት ዲብ ምደርሰ አካኑ ዐባይ ክምተ እንዴ አመርንሸረፍ ወሕትራም እግል ነሀቡ ወጅብ። ለሕዳም ሸረፍ ወዋጅብ ምደርሰ ለኢለአምሮ፡ ምደረሰን ህዩ ተረቶም እትምጅተመዕ እንዴ ፋህመው ሳሌሕ ጂል እግል ለአንሸኦ እግል ልክደም ቦም። እት አክር እሊክቱብ እብል ድግም እግል ድግም እግል ንድበኦ።


ሐቱ ደል ክሉም ቁድረት ምህናት ምን ምናም ከም ፈድብ ትከሐደው፡ እብ አር አሮ ህዩ ክእና ቤለው።

ሰዋግ ዋያረት ፡ኣነ ምለዐል ክሉ አን። ኣነ ሐቆ ኢህሌት አዳም እግል ልትራኩብ ኢቀድር። እት ጀው እግል ትሰውግ ኣልአለይ መቅደረት ለለሐዜ ገብኦ ምስለኩም ኣናቱ ምለዐል ክሉ ቤለ።

ሓኪም ፡ኣነ ሐቆ ኢህሌት እንዴ ሐመምኩም ዳዊኩም ኣለቡ ሰበት እሊ እት ሐንቲ ረቢ አርወሐት ለለሐዬ አንቱ ቤለ።

መስኡል፡ እሊ ሌቱልኩሙ ክሉ አማን እግል ልግበእ ቀድር ላኪን ክልኩም እት ሐንቲዬ እንቲም፡ አንቱ ሐብሬ ለሀይበኩም ሰበት እሊ ለዐበ ኣናቱ ኢኢትዐቦ እዩ ስምዖ።

መህንድስ፡ ልጅክ ንፍሱ፡ ሰበት ለሐምድ አማን እግል ልምሰል ቀድር፡ ኣነ ሐቆ ኢህሌት ምንቱ አብያት እግል ልሸቄ እግልኩም። ዕያዳት፡ አብያት፡ መሳክብ ኣናቱ ለእሸቅዩ እነ ሐቆ ኢህሌት ሐካይምኩም ውበዕድኩም እብ ሐማም ወሙትኩም። ዋያረት ኣነ ምን ኢእሸቅዩ ሰወግ ዋያረት ወኢኢትሐዜን መስለኒ። ክእነ እት እት ልብሎ ወለአተላላፊ ብዝሓም ሰብ ቁድረት መጸአው። እት አክር ምደርሰ ከራሰ ወጠባሽር እት ብጎሩ ለመክሐዳሆም እንዴ ሰመዐ ዐለ፡ ውልብ ምን ቤለ ክሉም ተሐት ገንሐው ወምለሀዩ ተሃገ አለቦም። ክሉም አብ አሮ ኣፍ ህዩ” ካልጠም ዐልነ እንታቱ ምለዐል ክሉ ቤለው ንብለኩም።



እብ መክበፍ ወጠን ሸባብ፡ ወደረሰ ዴጂቴፍ? ለሕትዳሌ ሰጅሐት

ልግብ

እት መጣር እንዴ ጊሰኮ ዎሮት ምን ሰፈር መጽእ ለዐለ መለሀዬ እግል እትከበት፤ እተ ቀበትለ ምነ ጥያረት ክሩያም ለዐለው አዳም እት አትናውር፤ ዎሮት ምነ ሓለት ሓያቼ ለበደለው ተየልል ሳደፊኔ፤ እሎም ክምእነ መሰሎ ጋራት አመቶም እንዴ ኢትወዴቱ ለለዐይሩከ፤ እሊ ጋር እሊ ምነ ባካቼ እት መሳፈት ዐስር ምትር ለኢትጉብእ መሳፈት ቱ ጀሬ ለዐለ።

እግለ መልሀዬ ቀበት ለአዳም እት አትቃምት፤ ዎሮት እናስ ክልኤ ቀሊላት ሽነዋ እንዴ ረፍዐ አስክዬ እት መጽእ ረኤክዎ። እተ ቅሩባዬ ክም በጽሐ እንዴ በጥረ እግለ አፍራድለ ዓይለቱ ልትሳለም ዐለ።

እት ሰልፍ ለሽነጡ ክም ከረ እተ ንኡሻይ ጀናሁ (ወድ ሰስ ሰነት ለጉብእ) ወልዱ እንዴ ደኑ፤ እግል መደት ረያም እብ ፈርሐት ወሰሓቅ እት ሕድ ተሐቀፈው። ሐቀሀ ገጽ ሕድ እግል ለአቅምቶ እተ ለቀድሮ መሳፈቲት ምን ሕድ ፍርቅቅ ክም ቤለው፤ ለኡብ እግለ ጀኔታዩ ክም እነ እት ልብሉ ሰምዐክዎ፤ እሊ ገጽከ ምን ረኤኮ ሰኒ ሰኔት ወልዬ፤ ኣነ ብዞሕ ሰፍሉልከ ዐለኮ። ላመ ጀኔታዩ ለሰሔቃዩ ሽውዩ ካጅል ለሀለ እት መሰል ወእብ ክፈኑት ሓምለት፤ አናመ እተ ክምሰልከ ደብ ብዞሕ ትሰፍለልኮከ ቤለዩ።

ሐቀ እለ ለእናስ እብጣሩ እንዴ ጉብእ አስክለ ዐቢታይ ወልዱ (ወድ ሴዕ አውመ ዐስር ሰነት ለጉብእ) እንዴ አቅመተ፤ ለክልኤ ረሐትለ እደዩ እተ ምልትሑ እንዴ ጨቅመዮን እሉ፤ “ግድም እንተ ሐቀ እለ እናስ ሸንጉል እንተ፤ ኣነ ብዞሕ ኢኮን እፈቴከ ወልዬ ፈዳብ” ቤለዩ። ወተማም ሕድ እንዴ ሐቅፈው ሰፈላሎም ረይሐው።

እሎም ክምእነ እት ወዱ፤ ለኒኢሸት (ወለት ክልኤ ሰነት) ለትጉብእ ወለቲቱ ህዬ፤ እት ሕቅፍ እመ ዲብ እንተ፤ ለዕንታተ ምን አብሀ እንዴ ኢተሀርሱ፤ እተ ሕቅፍ እመ እት እንተ እት ተኡለብዋ አስከ ትትጸበዋ ዐለት። ለእናስ “አስክለ ወለቲቱ እንዴ አቅመተ፤ “መርሐብ መላእከት” እንዴ ቤለዩ ምነ ሕቅፍ እመ እብ ምልሃሁ እንዴ ተከበተዩ፤ እብ ሰዓማት በልዐ ለሀለ መሰለ። ወቅሩባይለ ነሕሩ እንዴ ወደዩ ማን ወገለብ ነካነክዩ። ህተ ህዬ እተ ዶለ ሮገት ወርይሕት ወሰኒ እዋምእንት እት እንተ ለሰጌዳዩ እተ ፋቃዩ እንዴ ሐርገዐቱ ክምሰል አርወሐት ለአለቡ እተ ሰንዐት እት መሰል ህድእ ትቤ።

ሐቀ መደቲት ለወለት እግለ ዐቢ ሑታዩ እንዴ መጠዩ አስክለ እሲቱ ትወለቡ፤ ወእግል መደት ረያም ሕድ ሐቅፈው ወእት ሕድ ተመሀ ወደው፤ ወእግል መደት ረያም ለዕንታተ ለትቃምት እንዴ ዐለ፤ “ኣነ ምን ቅያስ ወለዐል እፈቴኪ” ቤለዩ። ወእብላሆም እደይ ሕድ ጸብጣም እት እንቶም እብ ገጽ ፋሬሕ ወልወቅ እት ሕድ ዐቦረገው። ዶል ለሰልፍዬ ሓዳይስ አዜ ለትሃደው መሰለው እቼ፤ ምናተ ሐር ለአጀኒቶም ክም ፈቀድኮ እለ ፍክረት እለ አሪምኮሀ። ህቶም እትለ ባካቶም ለሀለ አዳም ክሉ ረአሶም ልብ ካርያም እቱ የዐለው፤ ኣነ እለ ሓለቶም ወለ ህሌት እሎም ፈተ ሕድ ሰበት አትፈከረተኒ፤ እብ ክሱስ እለ ለኢከሰኒ ጋር እግል እት ሃገዮም ለዐለት እግልዬ ሸንሀት እግል እትመለክ እተ ሰበት ኢቀደርኩ፤ ለክርንቼ እት ተአርዐዴ ”ምንመ! ምንመ ተሃዴኩም ከም ዋድያም ህሌኩም?” እቤሎም። ምሰል ሕድ ዐስር አርበዕ ሰነት ወምንመ ተሃዴነ እለ ዐስር ካልኣይት ሰነትናተ ቤሌኒ፤ ዕንቱ ምነ ኖራይ ገጽ እሲቱ እንዴ ኢለሀርሱ። ተማም፤ ወምንመ ኢትረኤኩም ህዬ አክል አዬ ዋድያም ህሌኩም? እቤሉ። ለእናስ እት ደንጎበ ገጽ አስክዬ እንዴ በልሰዩ፤ ለፋሬሕ ገጽ አስክ እለ እተ አካኑ እት እንቱ፤ “ክልኤ ምዕል እብ ከማለን ወዴነ!” ቤሌኒ።

ክለአምዕ ለመትሳላዋም ሰበት ፈቀድኩ፤ እብ ሑዱ ክልኤ ሳምን አውመ ህዬ አዋሬሕ ዋድያም ጉብእ እብል ሰበት ዐልኮ ቲ። ከለሂጋዬ ብዞሕ ልብ እንዴ ይእከሬ እተ፤ “እንሻእለ አናመ ለህዳዬ ሐቀ ዐስር ክልኤ ሰነት ክም እሊ መሰል ለዘት ወጠምጠም እግል ለሀሌ እሉ እተምኔ!” እቤሉ። ለእናስ እተ ዶሉ ለገዴታዩ ለባርሀ ቅርጥን አበለዩ፤ ወትክ እንዴ ወደ ዕንቱ እት ዕንቼ እንዴ ከረዩ ተማም አቅመቱኒ፤ ወእበ እት ክለ ሓያቼ በርሀት ለቀርሐት ሂጋሁ፤ ፍንቱይ ወድ አደሚ ለወዴኒ ጋር አሰአሌኒ፤ ህቱ ክምእነ ቤሌኒ፤ “ኢትተምኔ፤ መለሀይ..ቀራር ሌጠ ንሰእ!” ወሐቀሀ ለግሩም ሰሔቃዩ እቡ ምን ሐዲስ ለገጽ እንዴ አብረሀ እግልዬ፤ እዴዬ እንዴ ጨቅመ፤ “ረቢ ልባርከከ” ቤሌኒ ከዐዱ እንዴ ከምከመ ትሳርሐ ምንዩ።

ዝበድ ዘየታት

ክል ዶል እግል ትፍቀዱ ለብእትከ ጋር፤ እንተ ምነ እለ ተአምን ወለዐል ሓዋር እንተ፤ ወምነ ልትረኤከ ወለዐል ድቁብ እንተ፤ ወምነ ትመሰልከ ወለዐል ዓቅል እንተ፤ ወክልኦት ዕጽፍ ናይለ እትለ ጉብእ ልግበእ ለትትዋሰፋ ወለዐል እንተ ሓይስ እንተ።

መዕሉመት

- ጽምብልዴተት ጠምጠምለ ጋራት እብ ንሳለ እንዴ ኢጉብእ እብ እገራቱ ለትደልዩ። በሀለት ህተ እብ እገረ ትጠምዋም።

አትጋረሞት ነፍስ

አትጋረሞት ነፍስ ዎሮት ሰኒ ምህም ላቱ ክፋል ናይ ጠወሮት ሸክሰዩት ቱ። እብ አትጋረሞት ነፍስ እንዴ ትኅፈዐ፤ ለጉብእ ነፈር ክም ከፎ እንዴ ወደ አሆታይ ፍክር ክም ለዐቅብ እግል ልትመሀር ቀድር፤ ወለ እት ለከፍኦ ተየልልመ ልግበእ። አትጋረሞት ነፍስ ርሕነ እት ቀበት አሕድ ለለዓውን ድዋራት እብ ገበይ ዕውትት ክም እንክልቀ ወዴኑ፤ ወእብ አማን እግል ናይ ነፍስ ሕሸመት ብዞሕ አሀምዩት ለቡ ጋር ቱ። ሰበቡ ህዬ ለጉብእ በዐል መቅደረት እግል ለኣምሩ ለወጅቡ ጋር ሀለ ምን ጉብኦ፤ ከፎ ክም ልትፋሀም፤ ከፎ ክም ልትገሴ፤ ከፎ ክም በሌዕ ወሰቱ፤ ከፎ ክም

ለብሱ፤ ወእተ ክምሰልሁመ እግል ርሑ እብ ከፎ ክም ሳይረ ወደይረ እግል ልፍሀም ብዲቡ። ዲብ እለ እቱ ህሌነ ዘመን፤ ብዝሓት ዐዶታት፤ እግል እለ አትጋረሞት ነፍስ ለከሰሰ መዳርስ አውመ ፍሱል ፋትሓት ህለዩ፤ ወምኑ ወኬን እንዴ ተዐደዩ እብለ ለከሰሰ አስክ ክሌጃት እንዴ ኢተርፍ ለጋር ልብ እንዴ ከረዩ እቱ ሕሰስ ሃይባቱ ህለዩ። ወእለ ህዬ እብ አማን ዐባይ መንፈዐት ለትትረከብ ምኑ ጋር ቱ። ከእለ ዐባይ መንፈዐት እለ ክሉ ሰበት ፈሀመያ ቱ ለእለ ለከሰሰ መዳርስ እት ሐጨር ወቅት እት በዜሕ ወእት ክለ እዲነ እት ልትነሸር መጽእ ለሀለ። እለ ጋር

እለ እብ ፍንቱይ እት ቀበት ደረሰ ወሰብ መቅደረት ልትረኤ ዲብ ሀለ ህዬ፤ እተ ዓም መዝሀር በሀለት ለከይፍዩት ለእበ ትትረኤ ወእተ ክምሰልሁመ እት ዐቂበ ወአትሳነዮተ ለአተንክብ። ኒበል እግል ቀደሞት መሓደራት ክም መሰል እግል ንንሰእ እንቀድር። ቀደሞት መሓደረት ክል ዶል ለሐሰት ገበይ ተ እግል ኒበል እንቀድር..ምሰምሳሁ ህዬ፤ ለሰልፋይ እት ሰብ እንጥባዕ አውመ ተእሲር እግል ሊዴ ለቀድር ጋር ሰበት ቱ። እትለ ጉብእ ልግበእ ህቱ እብ ቀላል ገበይ አሰር እግል ልሕደገ ዝያደ በክት ቡ።

ተርጀመት መሰል

“እት ሰርቅ ልርእወ እት ወስክ ኢለአሙኅ”

“እት ሰርቅ ልርእወ እት ወስክ ኢለአሙኅ” በሀለት ሐቱ ዶል እት ሰርቅ ልትርእዩ፤ ዶል ሓር ምን ወስክ እግልካመ ኢተአምኑ። እለ ሚ በሀለት ቱ፤ ወድ አደሚ ጸናሁ ለልኣኬ አውመ ሕብሩ ለበድል መዋዲት ክሉ ረእሱ እግል ልቅረቡ አለቡ፤ እግልሚ አዳም ሐቱ አከይ ጠቢዐት ረአው እትከ ምን ጉብኦ፤ ዶል ሓር እለ ጠቢዐት እለ ወለ ምን ተአዝም ምኑ፤ ህቶም ላተ እለ

ጣዓም

ሀበይ እተ ረአሰለ ቤት እንዴ ፈግረ፤ እግለ እተ ሐንቲሁ እግል ዓፊሁ ጅምዓም ለዐለው አዳም እበ መዋዲቱ ለአትፋግዶም ዐለ። ከእንዴ አክለሰ ክም ጌሱ፤ እግል ልትአመር ወልትሰሚ ሸንሀት ለዐለት እሉ አድግ እተ ረአሰለ ቤት እንዴ ፈግረ፤ አክል ሕድ ክመ ሀበይ ወድዩ ለዐለ መዋዲት እግል ሊዴ ጀራረቡ። እብላሁ እት እንቱ እትረአሰለ ቤት ዶል በራድሁ፤ እግለ ጡብ ናቀፈዩ ወሰቡብር ዶል ወደዩ፤ በዐለ ቤት ህዬ ብዞሕ ሐርቀ ወትቀጠቤ።

ሐቀ እለ ዎሮት ምነ ከዳሚኑ እትረአሰለ ቤት እንዴ ፈግረ፤ እግለ አድግ ገጽ ተሐት ዳገዩ። ወእብላሁ አድግ እግለ ጋር ከሰረዩ ወካጅል እት እንቱ አስክ መስከቡ ትሳርሐ። ከክል ዶል እግል ብዕዳም ለናሱብ መዋዲት፤ ምሰልነ እግል ልናሱብ ሰበት ኢቀድር፤ ሕነ ርሕነ ሌጠ እግል ንምሰል ብዲብነ እንዴኢኮን፤ ደለ እለ ረኤነ እግል ንፋሌ ወክመ ብዕዳም ለወድወ እግል ኔዴ ኢለአትሐዜኑ፤ ወእለ ለሳረት ቱ፤ ምን ሕሸመትኅ ክም ነኣነቅስ ወክጅል ክም ትጽብጠነ እግል ነኣምር ብዲብነ።

አከይ ጠቤዕከ ክል ዶል ምሰልከ ለሀለ ሰበት መሰሎም ኢለአምኑከ ሌጠ እንዴ ኢጉብኦ፤ ምኑ ወኬን ምን ብዕድ ለጀረ አከይ ውዳይ ወዊድያዩ ለትቀወ ዶል ሳድፍ፤ እንተ እት ሰልፍ ክሎም ትህመት ለትጉብእ እቶም አንፋር ትትሰሚ። እብለ ምሰምሳቱ፤ ሕነ

ለሸክሰዩትነ ለላጽሓት አከይ ሕብር እግል ኢልገልብበ ብዞሕ ሕሳብነ እግል ኒዴ እለ ወጅብ፤ ወእለ ለሳረት ቱ፤ ዶል ሓር ወለሀ ውዴ ወለሀ ግበኦ፤ ልብ እንዴ ኢትከሬ ሐቱ ዶል ለተሐርካሁ ሕብር፤ ዶል ሓር እብ ቀሊል ክም ኢትነጌ ምኑ እግል ትፍሀም ወጀበከ።

በህል እመራም

ዐባስ መሕሙድ አልዐቃድ (ወድ መሰር ላቱ እመር ኬትባይ)

- እንዴ ቀርእክዉ መንፈዐት ሐዳስ ለይእረክብ ምኑ ክታብ ክሉ ረእሱ ይሀሉ፤ አስክላመ አክትበት ለታፊህ ዶል እቀርእም ጋር ሐዲስ እትዐለም ምኖም፤ በሀለት ተፋህት ኖስ ሚተ? እሎም ታፍሃም ህዬ እብ ከፎ ከትቦ? ወእብ ከፎ ፈክሮ ወለሐሰቦ? እፍሀም ምኖም።
- ሓሰድ እለ ለእንዴ ዐረ እብከ አክልከ እግል ልግበእ ለልትሸነህ ኢኮን፤ ሓሰድ ለሀይ ለእንተ ሐር እንዴ ዐቅበልከ እቱ አክሉ እግል ትግበእ ለልትሸነህ ቱ።
- ፈርሀት ምን ሞት ጠቢዐት ሕያይት ሰበት ተ ሐቱመ ከለል አውመ ዔብ ለአለቡ እታተ፤ ምናተ ለዔብ እለ ፈርሀት እለ ሕኔት እንመልከ ወንትቀለብ እተ፤ ህተ ዶል ትመልከከ ወትትቀለብ እትና ቱ።
- ካልቅ ክም ሀለ ለለአትዋይን ነፈር፤ ለትደርክ ምሰምሱ፤ ህቱ እለ እዲነ ገሌ ንቅስ እምበል ካልቅ ዎሮትመ እግል ለአትምሙ ለኢቀድር፤ አውመ ህዬ ዲብ እለ እዲነ ብዞሕ ለለአትዐጅብ ወለአትፈክር፤ ምናተ እለ ዐጅብ ወፍክር እለ እምበል ካልቅ ዎሮትመ ለለአትህሉ ክም የሀለ ሰበት ልፍሀም ቱ።
- ሸሪፍ ወአሚን ግበኦ፤ እለ ህዬ ለአዳም ሸሪፍ ወአማነት ሰበት ለአስትህሉ እንዴ ኢጉብኦ፤ እንተ ዔብ ወከዶነት ሰበት ኢለአስተህላክ ቱ።
- ሚክረት፤ ለነፍዐከ ቅረእ ልብሉኩ ምናተ ኣነ ላተ እበ እሉ ትቀርእ ትነፈዕ እብለኩ።
- እንተ እግል ትርኤ እት በርሀት ሀለዮትከ ካሬ ኢኮን፤ ዲብለ በርሀት ለልትረኤ ጋር እግል ለሀሌ ለትሐዜኩ።
- አክትበት ለይእፍቱ እቡ ሰብብ፤ ዐሸም ዲብ እለ እዲነ ሰበት አለብዬቱ፤ ወአክትበት ለእፍቱ እቡ ሰብብ ህዬ፤ ኣነ እለ ሐቱ እዲነ ሰበት ኢትከፈኒ ቱ።



ዎሮት ነፈር ለምሸክለቱ እት ክታብ እንዴ ከትብወ እሉ፤ ለክታብ እት እዴሁ አጽበጠዉቱ ከአስክ ቃዲ ጌሰው እቡ። ህቱ ህዬ እተ ቀደምለ ቃዲ ክም በጥረ፤ “ሃኡመ እቅረኡ ክታብዩ” (እንኩም ለክታብዬ ቅርእው) ቤለዮም ወለክታብ ለእሉ ሃይባሙ ዐለው ፈትሐ እሉ። ህቶም ህዬ፤ የሀ ሚ ትብል ሀሌከ? እለ ሂገ እለ ፈንጎሕ ዮም አልቅያመ ዶል ሕሳብ ትትበህል እንዴ ኢኮን አዜ ሚ አምጸአተ? ቤለዉ።

ህቱ ህዬ፤ ያ...ያ፤ እለ ዮሙቱ ዲ ምን ዮም አልቅያመ አምዕለ ሕሳብ ህተ ተኣኬ፤ ዮም አልቅያመ ሐሰናቼ ወሰአዮቼ ምሰል እንዴ አምጸአዎም ቅብላት ሕድ ከርዎም ከለአትባዱሮም፤ ወእንቱም ዮሙቱ ለሐሰናቼ ትረሰዕኩመን ወለሰኣቼ ሌጠ እንዴ ጸባዋኩም እግል ሕሳብ እብጡራምዬ ህሌኩም፤ ከረቢ ኖሱ ልርደኣኒ ቤለዮም ልትበህል።



ትግራይት ዲብ ብሩር ወመዳይን

እተ እብ ክሰላል ዲብ ህግደ ትግራ ሳድፍ ለዐለ ነዋቅሰ ወመሐገዝ ከሊማት እግል አርተያት ዲብ ዮም 15 ወ 16 ናይ ወሬሕ 12 ሰነት 1984 ዲብ ጃምዐት አሰመረ እብ መአሰሰት ድራሳት አፍሪቅዩ ለትዝመጡ እብ ክሰላ ክለ ህግደ ትግራ ሳልፋይ መሕበር ጎማት ጋብእ ክምሰል ዐለ ዲበ ሐልፈ ዓሙድ ፈን ወዓዳት ርእያም ዐልኹ። ዲቡ ለዲብ ሰነት 1969 ለተአሰሰት ፊደላ ትግራይት ወብዕድ ለክሰሰ መሕበር ጎማት 9 ለትፈናተ ወራቅ ቃርብ ዐለ። እሊ ሐቲ ምን ቃርብ ለዐለ 9 ወራቅ ትግራይት እት ብሩር ወመዳይን ከፎ ህሌት? እብ ሆሳባይ ኤፍሬም ቃርብ ዐለ። ከእትሊ ናይ ዮም ዓሙድ ፈን ወዓዳትመ እሊ ወቀረቀት እሊ ልትብሉ ጽበዋ እግል ንርኤቱ።

“ህግደ ትግራ ሐቲ ምን እት ኤርትራዩ እት ፋይሕ ምድር ምድት ለህሌት እት ገብእ። ዲብ ምዴርያት ሰንሐት፡ ሳሕል፡ ሰምሀር፡ በርኩ፡ ጋሽ-ሰቲት ለኑበር ገቢል ትግራ ልትሃገዩ። ክምሰልሁመ ዲበ ተርፋ ምዴርያት ለብንር ቆሚያትመ ትግራይት ክምሰል ካልኣይት ሂጋሁ ልትሃገዩ። ቆምየት ትግርኛማ 10% ሂጋ ትግራ ለአምሮ ወልትሃገው። እግል መሰል እት እንክር ምፍጋር ጸሓይ ምዴርያት ሐማሴን ወአክለ-ጉዛይ ክምሰል እንክር ምውዳቅ ጸሓይ ሰራይ፡ ዲብ ጀዛይር ዳህላክ ወክፋል ደንካልየ ለነበሮ ዐፋር ትግራይት ክምሰል ለአምሮ ልትአመር። አምበል እሊ ዲብ ኤርትራዩ ለኑበር ሽዑብ ዲብ ሕዱድ ሱዳን አው ምፍጋር ጸሓይ ሱዳን ለኑበር ሽዑብመ ትግራይት ልትሃገ ክምሰልሁመ ሽዑብ ቤጃ እት ረአሰ ሂጋሁ ትግራ ልትሃገ። እሊ ህይ ክምሰል ዲብ ደዋይሕ መዲነት ከረን ለትኑበር ቆምየት ብሌን ለልትሃገዋ ትግራይት በህለት ቲ።

ትግራይት ምን ዘመን ቅዱም እግል ትትኩተብ ክምሰል አምበተት ታሪክ ለሓኪ። እሊ ህይ እብ ራዐዮት ሚሰዮን ሸዌደን ገሌ አክተበት ታሪክ ገቢል መንሰዕ ወክታብ ሕሩፍ(ፍጹል) ወ አክተበት ዲን ክሰታን ክቱብ እባቱ። ለአግደ ካታብ ቅዱሰ ወንጌል ማርቀሰ ዲብ ሰነት 1889 ትኩተብ። ዲብ ሰነት 1913 ድግም ክልኤ መንሰዕ ወላድ ሸዌደን ምሰል እዩላም ወላድ ዐድ እንዴ ትሳደው ለክትበው አክትበተመ ህለ። ሐዲሰ ገለድ ዲብ ሰነት 1931 እግል ካልኣይ ወቅት ትኩተብ። ወእብሊ እትለትፈናተ ሰዮታት አሰክ ሰነት 1981 ለትፈናተ አክትበተ እብ ትግራይት ክቱብቲ።

እምበል እሊ ናይ ዲን አክትበት እግል ዓዳት ወለመድ

ትግራይት ለሸሬሕ ዲብ ዘመን ቅዱም እብ ነፈዕ ወድ ዕትማን ለትኩተብ አክትበተመ ህለ። እብ ክሰላ ነፈዕ ድራሳት እግል ልግበእ ክምሰል ወጅብ እግልሚ ነፈዕ እተ ዘመን ለህይ እብ ትግራይት እንዴ ተሐሰረ አክል እሊ ጸገም እግል ልጸገም ለለትዐጅብቲ። ነፈዕ ክምሰል እሊ አዜ ብጸሕ ለህለ ናይ ምህሮ ወቴክኖለጂ ዘመን ምንዴ ለዐሌ አክልአይ አክትበት ወክትብ? ሰበት እሊቱ ህይ እብ ሰበቱ ካሬ ብሐሰ ወድራሳት እግል ልግበእ ኬትባይ እሊ ወረቀት ለትፋኑ።

እብ ሰበት ድራሳት ወብሐሱ

ምን እሊ እንዴ ተለ እብ ሰበትለ እብ ክሰላ ትግራ ለክትበው ኬትበት እግል ንርኤ። እሉም ኬትበት እሉም ሰሮም እንዴ ተአየሰው እግል መንፈዐት ትግራይት ለትበገሰው እት ገበእ ሰሮም ላታ እግል ናይ ኖሶም መሳሌሕቱ አክል እሊ እብ ሰበት ትግራይት ልትጸገም ለዐለው። ገሌ ሐ-ዳም ምን ብዝሓም ኬትበት ህይ እሉም ለተሉ እግል ንሰሚ እንቀድር፡-

1. ቀሽ ካርልዩሃን ሩዴን ወድ ሸዌደን
2. ፕሮፌሰር ኢኖ ሊትማን ወድ ጀርመን
3. ነፈዕ ዕትማን ወድ ኤርትራዩ
4. ፕሮፌሰር ኤድዋርድ ኡለንዶርፍ ወድ እንግሊዝ
5. “ ዎልፍ ሌሳላው ወድ አሚሪካ
6. “ ሊዩኒል በንደር ወድ አሚሪካ
7. ቀሽ አክሰልበርግላንድ ኤርትራያይ/ሸዌደን
8. መምህር ሙሳ አሮን ኤርትራያይ
9. አሰይድ ዳር ጸዋሮስ
10. አሰይደ ሊድያ ሳሙኤል
11. አሰይድ ሰለሙን ቀሽ ዩውሃንስ
12. አሰይድ አሚር ጸዋሮስ ወብዕዳም ህለው።

ለኬትባይሊ ወረቀት እንዴ አተለ ህግያ ትግራ ዲብ ብሩር ወመዳይን እንዴ ቤለ እትለ ከትብዩ ክቱቡ፡ ክእን ልብል፡- “እብ ሰበት ህግያ ትግራ ዲብ ብሩር ወመዳይን እክትብ ዲብ ህሌት ትግራይት ዲብ መዲነት ትረይሐት ወዲብ ብሩር ህይ እብ ጸሓይ ወብርድ ጀረሰት እብል ይህሌት። ለአን እክትብ እቡ ለህሌት ሰበብ ዕግል አው ርትዕል ትግራይት ዲብ ብሩር ወእብ ሰበትለ ምን ሕምርግት አው ምን ገበዩ ለፈልተት ትግራ መዳይንቲ። ሰበት እሊ ለዲብ ብሩር ልትሃገው ትግራይት ምን ዲብ መዳይን ለልትሃገው ትግራይት ተሐይሰ ወትወጅብ። እሊ በህለት ለዲብ ብሩር ኑበር ሽዑብ ትግራሁ ጭሪት ወዕግልት ዓዳቱ ወለመዱ ለሸሬሕ

እብ ምን አብዕቦታቱ ለጸንሐዩ ናይ ትልህዩ፡ ሐርሰ ወብዕድ ከሊማት እንዴ ኢሊሐምርግ ልትሃገዩ።

እግል መሰል እት ትልህዩ ወሕላይ ለልትነፈዕ እቡ ዘዶታት፡

- ወሶሚያ
- ጎይለ
- ምርግዲ
- ሰሰዒት
- ክምቦብ ወለመሰሉ።

ምሰል እሊ ሐረሰቶት ለልትነፈዶ እቡ ከሊማት ትግራይት እብ ዲብ መዲነት ለትወለደ ወለዐበ መትሃግየት ትግራይት ሰሩ ኢልትፈሀም። እግል ኦሮ ዲብ መዲነት ለዐበ ነፈር ክልኦት ብዕራይ ወኣላት ሐርሰ እንዴ ሁበክ ለኦብዕረት ጸምዶም ምን ትብሉ ኢኮን ዲብ ሕድ እግል ልጽመዶም ለኣላታ ሐርሰ እግል ኖሱ ሚ ክምሰል ልትበህል ኢለአምር። ለለትዐጅ ኦሮ ሐረሰታይ እግል ዲብ መዲነት ለዐበ ወድ አቡሁ ዲብሊ ለሐርሰ ዲበ ለዐለ ገርህት እንዴ ነሰአዩ፡ “ድርኻን” እንዴ ሀረሰ እሊ ሚ ትትበህል ክምሰል ቤለዩ “ማሕረሻ” ዲብ ልብል በልሰ እግሉ ልትበህል።

ምን ብሩር ዲብ ወላድ መዲነት ዶል ንትዐዴ ህይ ለወላድ መዲነት መብዘሐም ጭሮሬሕ ምህሮ ለረክበውቶም። ምናታ ትግራህም እብ ወላድ ብሩር ለትትአመር ኢኮን። ምን ዐረብ፡ ትግርኛ፡ ወዋላን ለተሓባበረት ቲ።

እግል መሰል፡

ምን ጢላን፡ ኖኖ፡ ብራዎ፡ እብ ትግራ፡ ኢፋሉ፡ ፈዳብ። ምን ዐረብ፡ ላላ፡ አሕሰን ወደልከልብ፡ አይዋ እብ ትግራ፡ ኢኮን፡ ሐይሱ ወድከልብ፡ አፎ፡ ምን ትግርኛ፡ ጠረቤዘት፡ ከቤርታ፡ ፈለጸ፡ እብ ትግራ ፡- ጣውሉት፡ ሸፈት፡ ፈካ፡

አምበል እሊ እት ለዐል ለትበህለ ብዕድ እብ ትግራይት ለንትነፈዕ እቡ ከሊማትመ ህለ። እግል መሰል ፕያቲ፡ ወጮ ወለመሰሉ፡ እሊ ከሊማት እሊ እብ ትግራይት ሸኣን ወ ሸመት ዲብ ብክ እግል ሚ ምን ብዕድ ንትጋሌ? ሰበት እሊ ትግራይት ዲብ መዲነት ዲብ ትተሐምረግ ትገይሰ ህሌት፡ እሊ ህይ መትሃግየታቶም ጀግሉብ ለህለው።

ዲብ ብሩር ለህለ ሕውናማ ህለ። ህቲ ህይ ዲብ ብሩር ምህሮ ሰበት ይህለ በህለት ዲብ ብሩር መዳርሰ ለአለቡ አካናት ሰበት በኬሕቲ።

ብዕድ ክምሰል ሕውነ ለልትረኤ ወእግል ትግራይት እዴ ለወደ ዲበ ምሰል ዲብ እብ አጸበጦትቲ። መሰለን እብ ገሌ እግል ዲን ወህግያ ለለሐባብሮ አንፋር ሕሩፍ ግእዝ ክምሰል ናይ ክሰታን ሌጣ ነሰኡዎ፡ እሊመ ቀለጥቲ። ዲን ወሂጋ በናቢንቲ።

ብዕድ ምሰል ታመት ሕሰበት ለገይሰ ከሊማት ወህቲ ለክልቆ አክይ-ፈሀም-መ ህለ። እግል መሰል፡

ዲብ ብሩር ለህለው “ አምበል ቅያሰ” ልብሉ፡

ዲብ መዲነት ለህለው ህይ “ መራ ዋሕድ” ልብሉ።

ዲብ ብሩር ለህለው “ እሊ እመርቱ” ልብሉ።

ዲብ መዲነት ለህለው “ እሊ መዕሩፍቱ” ልብሉ።

እሊ ሓሪት ንቅጠት ነሰኣን ምንገብእ፡ ወድለ መዲነት እሊ መዕሩፍቱ ልብል እት ህለ “ እሊ እመርቱ “ እግል ሊበል ምን

ሐዛቲ፡ ምናታ ለዐረብ ኢለአምር ላታ አሃሃ... “ እሊ መዕሩፍ ለልቡሉ ነፈርቱ” እንዴ ቤለ እግል ልፍህመ ቀድር።

ክምሰል እሊ እት ለዐል እግል እወድሐ ለጀረብኩ ብዙሕ ብዙሕ ከሊማት እብ ጌጋ ንትነፈዕ እቡ ህሌን። እሊ ህይ እብ ብዝሐ ለልትረኤ ዲብ መዳይን ቲ። ዲብሊ ምሰል ሶዳን ለልትጋንደ ምዳይን ዐድና ለኑበሮ ወላድ ትግራቶም ዝያደ ለናይ ዐረብ ሕበርበሮ ለልትነፈዶ።

አለ ጀውለት ጥዕም ተ እሊ!

ክል ዶል እብ ልብዬ “በሐር ቀየሕ ምን ዓሳህ ኢጸገብኩ፡ ኢትረኤነ ዲበ ወኢሰቤ፡ ህተአፎ ደምነ ሌጠ ትሸረፈት ወለህበትነ! ሐሱብ፡ እበልሰ ምነ ህይ ክደሐን ምዕል ህሌት!” እብል። እሊ ክሉ ህይ ሚቲ፡ እብ ሰፊነት እት ረአሰ ማየ ሰለል ምን ይእቤ፡ ለጀልበት እግል በሐር እንዴ ሰዋረት ዲብ ትደገሕ ለማነ ወገለበ ልትሳረር ግፎፍ ወአምዋጅ ጸዓዲ እት ዐፍዩ ወእብ ልብዬ እት እትሳረር ምሰሉ እግል ኢጊስ ምን ኢቀደርኩቲ።

ዕምር ለህበዩ ልርኤ፡ ዮም ዓመት ምን ሐቲመ ክልኤ ደርበት እት ረአሰ ጀልበት ወመርኩብ ማያት በሐር ቀየሕ ሰለል እቤ። ለሐቲ ምሰል ናይ ቅሩብ መሻቂት እብ ጀልበት ወለክልእ ምሰል ተንዝም እብ ግዲዱ ኢበል! ምሰል መሕበር መትሰዳዳይ ሙናድሊን ክፈል ዲሸ 16 ወ70 ለኑበረው ምሕርበት።

ለናይለ ሐሪት ፍንቲት ቲ። ጀውለት ሰያሐት ወፋግየት፡ እብሊ ዐበ ላኪን ጀውለት ፊቃዶ እስትሸሃድ ወወውቲ ዐለት። ለሙናድሊን እት ገሕቲላይ ለበዲር እብ ጸምእ ወአፈ ለወድቀው እቲ አርድ አብርያእ ወአውልያእ “ማይ ነቄዕ ሀለ” እት ልብሉ ሸሩሕ እሉም እት ህለው፡ ሐንገል ለሸፋንቲ እት እትፈከር ዐልኩ። እግልሚ፡ ለዐባዩ እት ዳግሞ አብዕነ ፍላን ዐስከር አቶብዩ ክም ሐርደቲ ለሰሩ ዎሮ ደም ሀረረ ወለሰሩ ዎሮ ሐሊብ፡ ልብሉ፡ ገሌመ ለአቅብር አውልየእ ማይ ነቅዕ ልብሉ ሰሜዕ ምን ዐለ፡ እቲ ዶል ለኣሳት አባይ አንደደቶ ቆም ወለደም ምሕርበት ሸርበት አርድየት እብ ማየ ወሰዐረ እግል ተአባርዶም ለነዌት እንዴ መሰለ ትረኤኒ።


እት ጋድመት ትምሳል ደባባት ሹህደ ሽዑብ ባጼዕ እግል ምሕርበት ልትከበት እት ህለ፡ ሐቆ ቀዝፍ ቅብጸት(ቀቢጽ) ሽዑብ ባጼዕ ሐቆ ሕርየት መዲነቲ እግል አወል መረት በሐሩ ለኬደት መርኩብ መንዝመት ነብረ ዐለም እግል ልትከበት ለዐለ አሴራር መጽኦ እት ሐንገልዩ።

ዲቡ ለትደገመ ቀሎት እስትሸሃድ ወምስትንክር ፈራሰት ዐጃይብቲ። እሉም ዮም ምን ልትመረሕ እት እብ ዐረብየት ልደረክ፡ ምን ሐንዚሸ እት ድግለል ጋብኣም ለህለው ምሕርበት ማሌ ለዐለት ገያዳቶም ወሸቡቶም እት ገጽ ትጋየሰት። ምኑ አሰክ መዐስከር በሕርየ ገደም ክም ዒርነ ለትመየ ትልህዩ ወሰሰዒት ህይ፡ ለሙናድሊን ሐዎም እንዴ ደፍነው ሐዘን ወጎማም እግል ኢልገራምሐም ለወድወ ትልህዩ መሰለት እቲ። እብ ትልህዩ ምድር እንዴ አጽበሐው ፈጅሪት እት ክልኦት መርኩብ ገዳታት እንዴ ትጸዕነው በሐር እት ለዐፋ ለወደወ ጀውለትመ ሃድኦት አዝመት እት እንተ ክም አንበተት፡ ክምለ እት ዝክርያት ሽመማም ህለው መሰሎ እንዴ ዐለው አዜመ ለመጸጸቶም እግል ልሳሩ እግል ልሕለው ወልሰሱዕ አንበተው። ገሌ ትዕባም ወሀርጉታም እት አካን ሐቲ ዕዙላም እንዴ ጸኑሕ፡ ፈዘዕ ክልተልሀው፡ ወልተልሀው ጸንሐው ለዓርፎ።

እሊ ጀውለት እሊ ኣነ ሰኒ ጠዐመት እቲ። ለምሕርበትመ ክነ ክምሰለዬ ቶም በሐርም ለክም ርሐም ፈትዎም ሰናቶም ሐድገው እቲ፡ መስክነው ወጀረበው እሊ ድኢኮን ክእን እት ረአሰ እት ሰቡ ትልሁያም ወሰሰዓም እቲ ኢኮን። ክህቶም ሰኒ ጠዐመት እቶም መሰል እቲ።

KMD ምን አሰመረ





ጅግራታት መራቶን-ፈንቅል እት ባጽዕ



መዳልየት ፍደት ወሕብረት ደበሳይ ህዬ ሳልሳይት ብሮንዝ ትሰርገዩ።

እት ደንጎበ እሎም ሐበን ዐዶም ለገብአው ርዶድዩን ምን ሓክም አቅሊም ቅብለት በሐር ቀየሕ ብርጋደር ጀነራል ተክሌ ልብሱ። መፈወድ ርዶደት ወፃዳት ሰፊር ዘመዴ ተክሌ ውበዕዳም ለትፈናተው መስኦሊን ናይ መዳልየት ወማል ጀዋእዝ ትክበተው።

ሉለት በሐር ቀየሕ ላተ ሚነት ባጽዕ ለሐልፈተነ ጅምዐት 7 ፌብሩዋሪ 2020፣ ምን ድወል ምፍጋር ጸሓይ ወምግባይ አፍሪቀ ለመጽአው ርዶድዩን ለሻረከው ዲቡ ጅግረ መራቶን እግል ዝክረት 30 ሰነት ታሪካይት ዐመልየት ፈንቅል ተሐደረት።

እትሊ 21 ኪሎ ምትር ለገልበበ ብድረ መራቶን 69 ውላድ ወ21 አዋልድ፡ እብ ዓመት 90 ርዶድዩን ሻረከው። እሊ እብ እድንዶይ መሕበር ትልህያታት ሐለት (ያፍ) ቅቡልየት ሳዳቅ ለረክበ ጅግረ ሰዐይ መራቶን፡ ድወል አቶብዩ፡ ግብለት ሱዳን ወተንዝዝዩ ሻርከ ዲቡ እት ህለዩ፡ ኤረትርዮ እብ ከዋክብ ርዶድዩን መትሐድራይቶም ዐለት። እትሊ ጅግረ እሊ አለምፕዶይ ኤረትሪ ግርማይ ገብረሰላሴ፡ 1ይ እንዴ ፈግረ መዳልየት ደህብ ትሰርገዩ። መዳልየት ፍደትም ደርቡ 2ይ ለፈግረ ኤረትሪ ሳምሶን ሰመሬ ተወወተ እብ። 3ይ ለፈግራም ምን ኤረትርዮ ዮናስ ዮዕቀብ እት ገብእ፡ መዳልየት ብሮንዝ ነሰእ። ምን አዋልድመ ናጽነት አማኑኤል አወላይት እት ፈግረ መዳልየት ደህብ፡ ሰምረት መርሃዊ

ብድረ መካይን ወመቶር-ሳይክል እብ መናሰበት ዒድ ፈንቅል



እብ መናሰበት ዝክረት 30 ሰነት ዒድ ፈንቅል፡ እት መዲነት ባጽዕ እግል 20 ኢነቱ ጅግረ መካይን ወመቶር-ሳይክል ገብእ። እትሊ በቃዐት ውቅል ለትረኤት እቱ ጅግረ፡ 61 መኪነት እብ ደረጃተን፡ ክምሰልሁመ 15 መቶር-ሳይክል ሻረከው። እት ደንጎበ ህዬ እት ፊኦት 1000 ሲሲ 'መኣንብተት' ሚሮን

ተወልዴመድህን፡ መዋእል ኪሮስ ወዩኤል አርአዩ፡ እት ፊኦት 1000 ሲሲ 'ገዳይም' ቱድሮስ ሰዩም፡ አሚር እማም ወወወት ወልዱ፡ ምን ፊኦት 1300 ሲሲ አሰክ 1400 ሲሲ፡ ሙሉጌታ ሀይሌ፡ ግዴምን ግርማይ ወሙሴ ነጋሽ፡ እት ፊኦት 1600 ሲሲ፡ ምን መኣንብተት ዮናታን መብራህቱ፡ አቤል ምሰግና ወቱድሮስ ናይዝጊ፡ እት

ኮበሪት ፕሊሶል ግንራራብ በሐር - እብ መናሰበት ፈንቅል

እግል ዝክረት 30 ሰነት ታሪካይት ዐመልየት ፈንቅል ጅግረ ፕሊሶል ሽምሽም ግንራራብ በሐር ገብእ። እሊ እቱ ሐልፈት ጅምዐት 7 ፌብሩዋሪ ለተ'መ ጅግረ ፕሊሶል፡ ሰማን ፈሪቅ ምን ለትፈናተ አጅሀዘት እብ ክልኢቱ ጅንሰ-አሰል ሻረከው ዲቡ። እትሊ አወላይ ለፈግረ ፈሪቅ ውዛረት ዓፍየት አቅሊም ቅብለት በሐር ቀየሕ እት ገብእ፡ ካልኣይ ህዬ ፈሪቅ ቅዋት በሐር ኤረትርዮ ገብእ። ሳልሳይ ፈሪቅ ፖሊስ ቅብለት አብሐር ቀየሕ። እት ናይ አዋልድ ህዬ ፈሪቅ ቅዋት በሐር ኤረትርዮ አወላይ እት ፈግረ፡ ደርቡ ፈሪቅ መስነዕ እስመንት ወሳልሳይ ፈሪቅ ፖሊስ አቅሊም ቅብለት በሐር ቀየሕ። እምበል እሊመ እት ባካት ሆቴል ደህላክ ግራንድ፡ ለትፈናተ መሳፋት ለሽምሽ ጅግረ ሕማሴ ጋብእ ዐለ። እትሊ ሰማን ፈሪቅ ውላድ ወሲዕ ፈሪቅ አዋልድ ልትጃግሮ እት ህለው፡ ፈሪቅ ንሰሪ እብ ውላድ ወአዋልድ አወላይ ፈግረ። አወላይት እት 100 ምትር ሄለን ደበሳይ ምን ፈሪቅ ንሰሪ፡ 2ይት ሄርሞን ኢዮብ ምን ፈሪቅ ሓሬ፡ ሳልሳይት በይሉል ሐጎስ ምን ፈሪቅ ሳዋ። እት 200 ምትርመ ርግኣት ተስፋማርያም ምን ንሰሪ አወላይት፡ ካልኣይት ሄለን የማኔ ምን ሓሬና ወሳልሳይት ትዕቤ ደበሳይ ምን ሰንደቅ። እት ናይ 300 ምትር ከማን ሰሚረ ሰዑድ ምን ፈሪቅ ንሰሪ አወላይት እት ፈግረ፡ ካልኣይት ሄለን ዮሀንስ ምን ሓሬና ወ3ይት ዮርዳኖስ ህንጻ ምን ቅዋት በሐር። እት ሕማሴ ናይ 200 ምትር ምን ውላድ አወላይ ዜናዊ ተክሌኣብ ምን ፈሪቅ ብድሆ፡ ካልኣይ ዮሃንስ ተክሌ ምን ፈሪቅ ንሰሪ ወሳልሳይ ፍቅሬ የማኔ ምን ፈሪቅ መኸቴ። እት ናይ 400 ምትር ውላድ አወላይ፡ ሳሙኤል ተስፋ ምን ፈሪቅ ንሰሪ፡ 2ይ አማን ደባስ ምን ፈሪቅ ብድሆ፡ ወሳልሳይ አሕፈሮም ተክሌኣብ ምን ፈሪቅ ሹዕላ። እት ናይ 800 ምትርመ ነጅም በዶን ምን ፈሪቅ ንሰሪ አወላይ ፈግረ እት ሀሉ፡ ካልኣይ መህዲ ብርሃኔ ምን ፈሪቅ ብድሆ ወሳልሳይ ህዬ መርሃዊ ጸጋይ ምን መኸቴ። እብሊ ህዬ ለትወወተው ፍረቅ ወአፍራድ ናይ ማል፡ መዳልየት ወካሳት ጀዋእዝ ተሀዩበው።

ፊኦት 1600 ገዳይም ህዬ፡ ሐበን ጎይትአም፡ ተግጎስ ዐንዱብርሃን ወሮቤል መዐሾ ተወወተው። እት ናይ መቶር-ሳይክል ጅግረ እት ፊኦት 125 ሲሲ፡ ነቢል ክዶር ወሀብቶም ገብረመስቀል አወላይ ወካልኣይ፡ እት ፊኦት 175 ሲሲ ናሆም ይትባረኹ፡ ሳምኤል ተስፋማርያም ወእምባይ ሳምኤል ምን አወላይ አሰክ ሳልሳይ ፈግረው። ምን ናይ 600 አሰክ 1200 ሲሲ ህዬ ኢናስ ነሰረዲን አወላይ ተወወተ።





ዕላል ወዴት ፈንቅል

ዕላል ወዴት ፈንቅል፡ ከበሽረቱ ለሞዳይ ምን ረዕሰ ከሬት ከሰሰዐት፡ ክም ዓረዩ ለህዳይ ትርን ቤለ እብ ሕበር፡ ለጣሻት ነኢሽ ወዐባይ ወክርን ወዴት ንጋረት፡ ምንለ ውቁል ለሻባይ እት በርጅ መጸው ወረዴ፡ እት ትትጸበርም እብ አኖ፡ ሐናደው እት ሐረተ፡ እበ ሰይፍ ለሶታይ ፈርሐ እግሎም ፈትዮም፡ ወትረመጨ ለአባይ።

አቤ! ለሓዩት ወረዴ፡ ተህራደበው እብ ዝያድ እግል ልንዝዕው ለመርዓት፡ ቀሰብ ኢኮን እብ ምራድ ረቢ እንዴ ሰደዮም፡ ሞላይ ለጠፍ አልዕባድ በርቀው ዲበ እግል ባጽዑ፡ እብ አሰዩፎም ወጅራድ ወሌመው ዲበ ቀበት ማይ፡ እበ ነኢይሽ ለጅላብ በዋቢር ዐባዩ ጽብጠው፡ ከዴርው እብ ለሰላብ ደርጊ ቅነጽ መጽቶ፡ ለኢለኣትጋሚ እንግላብ ነብረ ሐድገ እብ ጽብጠው ወሐሊብ ዱሉይ እት ሕላ ገሌ ብጣሩ ትጸበጠው ወገሌ ፈግረ ምን አግባብ።

ደርጊ እብ አርወሐት-አፍግር፡ ተሐራረብ ምጋሩ ምናት ሕልቅሙ ትጸበተት፡ ከተረው ቤለ ለአሰራሩ ዓለም ክለ እብ ተማመ፡ አተንሴቱ ለገዓሩ በዴቱ ቤለ ወቀዌኹ፡ እንዴ ገብአ ብጣሩ ወአውኪር ቀደም ለአሳድሮ፡ እግል ለአትዐሩ ለሓሩ ለዴሽ ሳብት ኤማነ፡ ለአምዕል አበ አፍጋሩ ምንሕድ ግለይ ወደዩ፡ ቅዋት በሐሩ ወአጋሩ።

ደገድግቱ ወደዎም፡ ፍራስ ለሐር ኢልብሎ እት ከረን እንዴ ፈርህዎም፡ ዲብ ጋሕቲላይ ገንድ ኢልብለ ተዐብነ፡ ገበይ ረዶም እን ሳፎሮ ሳሳት ምንዲ ልትዐደው፡ ወጋድሞታት ምን ሳጥሮ ሚክም ወዱ ኢቀወው፡ ለአግቡይ አምሮ ወገሰር እብ ከሪጣት ልትመርሐ፡ እበዩ አቱ ወፈግሮ ለህጃም እግል ልትሻፈግ፡ ላሊ ወአምዕል ለሐባብር ድቁብ አጽዋር ወአጋር፡ መጦር አሕድ እት ወግሮ ገበዮምተ ዴሽ ደርጊ፡ ክምለህይ እግል ልትዘርዘር።

ቅዋት በሐር ወምድር፡ እሎም ክልኣት መነቲት ለአባይ ዐጭሙ ወሰግሁ፡ ምን ሕድ ወደው ፈንቅል ገናይቱ አትሐደገው፡ ለኩፍ ክምለ ገነዲት ፈንቅል ፈንቅለቱ፡ መረ ዲቡ ለአፈቲት እት ሐዋዊን አትቃበሉ፡ ክም በትክ ለመሰኢት እብ ለክፍለ ዋያራት፡ እግል ልፍገረ ለትግቢት ሐሩቀቱ አትባረደ፡ ዲብ ረዕሰ አንስ ወአጅኒት ጅግሉብ ዋድቅ ምራቁ፡ በዲር በዐል ሐዋኒት ለህይ መኣዜ ሰልፋቱ፡ በዲር በዐል ሐዋኒት።



ሳልሕ ሙስ (ውድ ሐቢብ) ፈብርዋሪ 2020

